

稗史叢書之四

太平天國軼聞

上海進步書局印行

# 太平天國軼聞卷二目錄

肅順之心折曾胡

肅順之贊助中興

駱秉章爲賽尙阿所刻

祁文端之嫉賢愛不肖

翁文端議撤楚軍

胡文忠善用官文

閩朝邑之調和

官胡之乖牾

胡文忠之能用人

多鮑之任用

黃開榜陳國瑞合傳

成功將軍之殉難

李帥戲稱文蝦

江忠烈公之殉難

科爾沁郡王之武勇

金陵之攻克

得勝口之戰績

陳國瑞之暴戾

錢江之創釐捐

王武愨公之殉節

太平天國軼聞卷二 目錄

工

曾文正之屢瀕於死

三河死事之慘

何桂珍之冤死

勝保之死當其罪

捻亂統兵大臣表

殺降之無理

賈令之先知

賊畏烏公

武昌之初陷

清河令之權術

九節銅蘿

樓船

楊彭嶺

左舍人薦江忠烈

兩文節之取義成仁

江南大營死事紀略

吳文節被害塔城

朱伯韓之識張忠武

多龍鮑虎

李愨肅之流芳

好官殉難

馬生角

勞崇光之饋砲

崔提督之使酒復諫

林剛愨公是好男兒

朱洪章爲破金陵之首功

張晉祥言利之奏

幕僚爲中興將相

天青緞

鐵鎖

蛇山

雷再生

王壯武張宴九嶷山

鄧亞魯之勇武

胡林翼之遠慮

溫紹原守六合記

江南大營之二次失陷

張國樑逸事

張玉良之顛躓

杭州之陷

假馬總鎮

卞令之死戰

何制軍之畏蕙

官弁之分米

熊子聲之膠船

兩軍門之垂成死綏

炊飯太守

曾文正公知人

太平天國軼聞卷二 目錄

張阿寶

多隆阿之將略

客將戈登事略

洋將之儒雅風流

長勝軍始於客將華爾

# 太平天國軼聞

## 卷二

### 肅順之心折曾胡

肅順於咸豐年間。始爲御前大臣。貴寵用事。後遂入值軍機。頗擅威福。以驕橫獲罪。然其人機警敏給。實爲滿大臣不可多得之人才。是時粵賊勢甚張。而討賊將帥之有功者。皆在湖南。朝臣如祁文端公。彭文敬公。多嘗焉不察。惟肅順知之已深。頗能傾心推服。平時以座客談論。常心折曾文正公之識量。胡文忠公之才略。蘇常旣陷。何桂清以棄城獲咎。清文宗欲用胡公總督兩江。肅順曰。胡林翼在湖北。措置盡善。未可挪動。不如用曾國藩督兩江。則上下游俱得人矣。上曰善。如其議。卒有成功。左文襄公之在湖南。巡撫幕府也。已革永州鎮樊燮控之都察院。而官文恭公督湖廣。復嚴劾之。廷旨敕下文恭密查。如左宗棠果有不法情事。可卽就地正法。肅順告其

幕客湖口高心夔碧涓心夔告衡陽王闈運紉秋。闈運告翰林院編修郭嵩燾筠仙。郭公固與左公同縣。又素佩其經濟。傾倒備至。聞之大驚。遣闈運往求救於肅順。肅順曰。必俟內外臣工有疏保薦。余方能啟齒。郭公方與京師潘公祖蔭同值南書房。乃挽潘公疏薦文襄。而胡文忠公上敬舉賢才力圖補救一疏。亦薦文襄才可大用。有名滿天下。謗亦隨之。語上果問肅順曰。方今天下多事。左宗棠果長軍旅。自當棄瑕錄用。肅順奏曰。聞左宗棠在湖南巡撫駱秉章幕中。贊畫軍謀。迭著成效。駱秉章之功。皆其功也。人才難得。自當愛惜。請再密寄官文錄。中外保薦各疏。令其察酌情形辦理。從之。官公知朝廷意欲用文襄。遂與僚屬別商具奏結案。而文襄竟未對簿。俄而曾文正公奏薦文襄以四品京堂襄辦軍務。勳望遂日隆焉。此事爲高碧涓所述。碧涓與紉秋。皆嘗在肅順家教其子者也。

### 肅順之贊助中興

清咸豐十一年。各國聯軍入京。文宗挾后妃等走熱河。未幾崩。及梓宮還京。那拉后

遂斬戶部尙書宗室肅順於菜市。清祖制。凡宗室有罪。皆於宗人府賜自盡。不刑於市。此次不遵祖制者。以叛逆論也。肅既伏法。京師人莫不以爲大奸之除。非那拉后不能有此剛斷。頌聲徹上下。嗚呼。豈知肅順有大功於國。實隱成中興之業哉。咸豐間。左文襄會試入京。伏闕上書。痛陳時事。多觸忌諱。文宗大怒。革舉人。命順天府五城逮捕治罪。旨未下。肅陰命文襄逸。次農旨下。而文襄已出國門矣。肅與文襄初未謀面也。曾文正皖南之敗。退守祁門。劾者紛起。廷議將改簡。肅大言曰。勝敗兵家之常。臨敵易帥。兵法大忌。不如使之帶罪立功可也。文正遂得一心於兵事。卒平大亂。當欽差大臣向榮之沒于軍也。肅力舉張忠武國樑繼其後。文宗將許之。時長洲彭文勤蘊章在樞廷。文宗問彭曰。爾以爲如何。彭曰。張國樑究係反賊投誠。其心叵測。乃簡和春繼向任。而江南軍事大壞。庚申大營潰敗。張忠武陣亡。和亦畏罪自盡。兩江總督何桂清亦逮問伏法。向使從肅言。則張武忠必能支持。待曾軍南下。合圍金陵。決無江浙兩省之糜爛矣。肅之才識。非有大過人哉。直至今日。天下無知左曾二



公。隱爲肅所用者。徒薪曲突。功人無功。千古傷心矣。

### 駱秉章爲賽尙阿所劾

咸同間用兵。楚材蔚起。其識拔而獎成之。展轉推挽以應名世之期者。駱文忠公也。公鎮楚蜀。經畫儲胥。論者以蕭何關中。寇恂河內爲比。以湖南復湖北。以湖南北復東南。諸行省。雖勛望不逮曾胡之赫赫。而功亦偉矣。當賽尙阿之授鉞也。軍過湖湘。供張獨薄。賽因奏湘撫吏治廢弛。駱遂奉命內召。時粵軍業已躡及轄境。暫留籌防。嗣以力完危城。清帝亦知公可倚任。仍畀封圻有益於時局者甚大。設當日楚疆不警。文忠被劾入都。非列閭曹。卽淪廢籍。二三豪俊。未必盡出風塵。賽尙阿一言。不幾長城自壞歟。

### 祁文端之嫉賢愛不肖

祁文端公累掌文柄。門下士私相標榜。推爲儒宗。以學問淹雅負重望。一時攷諫辭章之士。與講許氏學者。翕然稱之。道光季年。以尙書入爲軍機大臣。與首相穆彰阿。

共事。無齟齬。咸豐初。遂爲首相。粵賊之踞武昌漢陽也。進陷岳州以逼長沙。曾文正公以丁憂侍郎起鄉兵逐賊出湖南境。進克武漢黃諸郡。肅清湖北。捷書方至。文宗顯皇帝喜形於色。謂軍機大臣曰。不意曾國藩一書生。乃能建此奇功。祁公對曰。曾國藩以侍郎在籍。猶匹夫耳。匹夫居閭里。一呼蹶起。從之者萬餘人。恐非國家福也。文宗默然變色者久之。由是曾公不獲大行其志者七八年。侍郎呂文節公賢基疏論天下事。頗忤政府。是時皖北全境糜爛。祁公請派呂公還籍治團練。無兵餉以畀之。呂公自陳書生不知兵。陛辭日痛哭而出。未幾遂殉舒城之難。刑部員外郎邵懿辰以經學文章名於世。性戇直。好議天下大計。與祁公學術不相中。又素與曾公善。時爲軍機章京。會粵賊北犯。祁公請遣懿辰出防河。人謂懿辰。黃河縣互千里。縱有勁兵數萬。且不易守。而況徒手無一兵者乎。此政府欲置君死地。否則以疏防罪君也。已而粵賊果渡河。轡畿輔。懿辰坐是鐫秩去。寇氛日棘。祁公乞病。予告。同治初元。徵用耆舊。復以大學士銜補禮部尙書。入值鴻德殿。適兩江總督何桂清以玩寇棄

城逮入刑部獄。輿論皆謂死有餘罪。祁公獨上疏力救。爲言路卞寶第等所糾。士大夫誦其彈章。交口稱善。由是清望益減。蓋好賢惡不肖。宰相職也。祁公於賢者嫉之如仇。於不肖者愛之若命。觀其好惡。可以卜其相業焉。

### 翁文端議撤楚軍

翁文端以咸豐初年入政府。後遂爲首相。力薦何桂清兼資文武。必能保障江南。迄蘇常告陷。猶不悟。力庇桂清。謀贖其罪。與端華肅順等共事。肅順尤橫恣。公未嘗迂之。庚申之變。乞病予告。亦以同治初元徵起。公條議時事頗備。不自上疏。詣軍機大臣請代陳之。其大旨謂楚軍徧天下。曾國藩權太重。恐有尾大不掉之患。於所以撤楚軍削曾公權者。三致意焉。是時曾公負朝野重望。天子方倚以平賊。軍機大臣見而晒之。由是不獲再用。但有旨暫權都察院事。以疾篤辭。遂卒。(下略)

### 胡文忠善用官文

伯相遼陽文恭公官文總督湖廣時。宮保益陽胡文忠公巡撫湖北。文忠才氣卓犖。

以一行省之力。經綸天下事。文恭拱手以聽。遂成大功。海內兩賢之。然二公離合之始末。議者或未之知也。咸豐五六年間。粵賊陷踞武昌。漢陽。蔓及旁郡。蹂躪數千里。是時文恭由荊州將軍改總督。凡上游荆宜襄鄖諸郡兵事。饒事悉主之。文忠駐軍金口。進規武昌。凡下游武漢黃德諸郡兵事。饒事悉主之。二公值湖北全境糜爛之餘。皆竭蹶經營。各顧分地。文忠尤崎嶇險阻。與勅寇相持。獨爲其難。督撫相隔遠。往往以徵兵調餉。互有違言。僚吏意嚮。顯分彼此。牴牾益甚。文恭於鉅細事不甚究心。多假手幕友家丁。諸所措注。文忠尤不謂然。既克武昌。威望日益隆。文恭亦欲倚以爲重。比由荊州移駐武昌。三往拜而文忠謝不見也。或爲文恭說文忠曰。公不欲削平巨寇邪。天下未有督撫不和而能辦大事者。且總督爲人易良坦中。從善如流。公若善與之交。必能左右之。是公不翅兼爲總督也。合督撫之權以辦賊。誰能禦我。文忠亟往見文恭。推誠相結納。謝不敏焉。文恭有寵妾。拜胡太夫人爲義母。兩家往來益密。饋遺無虛日。二公之交亦益固。文忠於是察吏籌餉。選將練兵。孳孳不少勸。文

恭畫諾仰成而已。未嘗有異議。每遇收城克敵。及保薦賢才。文忠輒陰主其政。而推文恭首尸其名。朝廷以文恭督湖廣數年。內靖寇氛。外援鄰省。成功甚偉。累晉大學士。授爲欽差大臣。寵眷隆洽。文恭心感文忠之力。而文忠亦益得發舒。凡東南各省疆吏將帥之賢否進退。與大局一切布置。每有所見。必進密疏。或與文恭會銜入告。文忠所引嫌不能言者。亦竟勸文恭獨言之。訐謨所定。志行計從。人謂文忠有旋乾轉坤之功。不僅澤在湖北也。

### 閻朝邑之調和

胡文忠遘太夫人喪。得旨賞假百日。營葬後。卽起視師。駐軍皖鄂之交。省中大政。皆歸文恭公主持。文恭聽已革總兵樊燮之訴。奏劾湖南巡撫幕賓。今侯相左公。左公爲文忠同學友。文忠嘗薦其才可大用者也。旣被嚴劾。文忠愠不言。貽書曾文正公。密解其獄。且薦左公襄辦江南軍務。文恭有門丁頗爲姦利。奔競無恥者。多緣以求進。文忠所素欲參劾者。文恭薦之。得居要地。府中用財無訾省。不足則提用軍餼。耗

費十餘萬金。文忠積不能平。獨居深念。若重有憂者。當是時。今協揆朝邑。閻公。以戶部員外郎總理糧臺。兼運帷幄。往謁文忠。請間言事。文忠屏人以督府事告之。曰。方今籌餼如此艱難。而彼用如泥沙。進賢退不肖。大臣之職也。而彼動輒乖謬。今若不舉實糾參。恐誤封疆事。爲朝廷憂。吾子以爲奚若。閻公對曰。公誤矣。夫本朝二百年中。不輕以漢人專司兵柄。今者督撫及統兵大臣。滿漢並用。而焯有聲績者。常在漢人。固由氣運轉移。亦聖明大公無私。剗刮畦畛。不稍歧視之效也。然湖北居天下衝。爲勁兵良將所萃。朝廷豈肯不以親信大臣臨之。夫督撫相劾。無論未必能勝。就使能勝。能保後來者必勝前人耶。而公能復劾之耶。且使繼之者。或勵清操。勤庶務。而不明遠略。未必不顯己自是。彼官至督撫。亦欲自行其志。豈必盡能讓人。若是則掣肘滋甚。詎若今用事者。胸無成見。依人而行。况以使相而握兵符。又隸旗籍。爲朝廷所倚仗。每有大事。可借其言。以得所請。今彼於軍事。饒事之大者。皆惟公言是聽。其失祇在私費奢豪耳。然誠於天下事有濟。卽歲捐十萬金。以供給之。未爲失計。至其

位置一二私人。可容者容之。不可容則以事劾去之。彼意氣素平。必無迂也。此等共事人。正求之不可必得者。公乃欲去之何耶。胡公擊案大喜曰。吾子真經濟才也。微子言。吾幾誤矣。由是益與文恭交驩無間言。文恭亦敬服之終身。迨文忠薨於位。未幾而文恭劾巡撫嚴公澍森去之。威毅伯曾公巡撫湖北。又劾文恭去之。湖北從此多事。其閎整富強之績。亦稍隕矣。後人於是益以文忠之能用文恭爲美談云。

### 胡文忠之能用人

胡文忠以道員募鄉兵擊賊。隸曾文正公部下。追賊至江西。文正密薦公才可大用。俾率師援湖北。當是時。羅公以甯紹台道赴援湖北。公一見。執弟子禮甚恭。雖僚屬語。必稱羅山先生。事無鉅細。諮而後行。詢其軍將吏之勇怯材鄙而擢汰之。羅公亦稍稍分其衆隸公。俾部勒其士卒。由是盡傳楚軍規制。變弱爲強。自此始。羅公力攻武昌。被重創。三日薨。公哭之慟。以弟女妻羅公長子。舉其裨將李忠武公續賓代領其軍。勇毅公續宜佐之。時李公父母皆篤老。方事之殷。以不能歸省爲憾。公爲迎養。

其父母晨昏定省。如事父母。日發書慰二李。二李皆感激。願盡死力。忠武既克九江。鼓行而東。師銳甚。會援賊大至。戰沒廬江三河鎮。公方奉太夫人諱。有旨百日後起視事。公具疏懇辭。忽聞忠武死綏。遂投袂起。以大事屬勇毅公。俾鳩潰散。修守備。弔死療傷。期年而後用之。且謂之曰。迪庵自任滅賊。而賚志長暝。吾誓爲竟前功。以報死友於地下。當與弟勉之。迪庵者。忠武公字也。勇毅於是日夜訓厲其衆。衆益奮。南解寶慶之圍。北奠淮西地。大敗悍賊陳玉成之衆於挂車嶺。賊再竄湖北。再平之。勳望隆然。不數年。超擢安徽巡撫。

### 多鮑之任用

曾文正公素有知人鑒。所識拔多賢俊。胡文忠公常從問士大夫賢否。聞曾公有一言之獎。輒百方羅致。推轂惟恐不盡力。或畀以軍寄致大用。是時公所擢任於儔人中者。又有忠勇公多隆阿。今一等子提督鮑公超。多公性頗伎。而老於兵事。饒智勇。鮑公後起。以饒果克敵。功尤多。二人不相下。公因激勵而兩用之。謂多公曰。鮑超蠢



悍。非兵家所貴。賴吾子庇廕。以有今日。超之功。皆子之功也。幸始終左右之。謂鮑公曰。多公言。汝勇而無謀。汝能奮功名。無蹉跌。則可以間執人口矣。勉之。二。郎河之戰。賊來益衆。超將退矣。公遣騎馳書告曰。寇深矣。如林翼輩。生死無足重輕。君威名蓋世。宜自重。盍少退。超益力鬪。遂大捷。

### 黃開榜陳國瑞合傳

黃開榜字殿臣。湖北人。所行無賴。不齒於鄉里。流寓河南沙溝營。王都司奇其貌。王無嗣。以女妻之。隨營差遣。得額外。未幾。王卒。宦囊數千金。盡爲黃有。日縱淫博。同伍逐之。被黜除名。年餘。聞皖營募勇。遂往投軍。閱三年。累積戰功。得參將。臨淮關克復時。其部長於俘虜中。得一少年。充火兵。黃出巡營。見火兵狀貌奇偉。問其姓名。少年對曰。小人姓陳。湖北人。陷於賊中。今幸逢大人。重見天日。願效犬馬之勞。以供驅策。黃大悅。收爲義子。命名國瑞。字慶雲。易姓黃。隨黃擊賊。屢立戰功。年餘。黃統水師鎮高郵。國瑞官陞副將。晉總兵。吳棠爲漕督。奏請幫辦軍務。未幾。山東白蓮教匪作亂。

國瑞時奉僧王命。進勦教匪。兵出隊。盡賜以酒。誓不克。母生還。時賊鋒大熾。寡不敵衆。全軍覆沒。逃回者僅四十餘人。盡斬之。明日雷雨大作。國瑞身先士卒。直逼賊濠。躡梯將半。賊以撓鈎鈎住。國瑞辮髮危甚。陡然霹靂一聲。賊驚鈎落。國瑞一躍而上。衆隨以登。三晝夜掃蕩長城七十墟。于是國瑞威震海內。僧王代爲奏請歸宗。苗霈霖叛。國瑞奉命出征。山東父老牛酒競餞。爲立陳將軍生祠於剡城之陽。陳軍攻苗匪。一晝夜盡破數十墟。苗霈霖帶數卒遁。爲王萬青總統執而戮之。苗匪平。天子嘉之。欽賜國瑞黃馬褂頭品頂戴。加黃開榜提督銜。爲其爲國得將也。陳督兵嚴而好殺。罰罪不顧親朋。不好婦女。喜與僧人交。嘗言功成名立之餘。退隱名山古寺。爲方外遊。終其天年。於願足矣。其出兵身先士卒。戰無不克。攻無不利。性燥急。與人論事不合。當面斥之。酒後使氣。嘗統親兵百人。帶刀直闖吳漕帥署。大門閉。拔刀劈門。吳漕帥調兵禦之。陳兵潰散。漕帥奏參陳瘋癲亂法。陳由此休職。奉命入都云。

### 成功將軍之殉難

副將周公兆熊。字輔臣。四川成都縣人也。性惠愛。喜聲詩。有古儒將風焉。粵匪之踞鎮江也。犯公營。圍數匝。公遣裨將出。詣金陵節帥求援。與賊相持五日。擊殺過當。會水道斷絕。軍士求飲不得。渴死者相繼。賊攻益急。公度援不可待。乃布火藥帳下。具衣冠危坐。暗然火繩藏衣袖間。命壯士彈琵琶。調久不協。公笑曰。爾方寸亂耶。乃從容手自揮弦。賊疑不敢進。久之。知公虛實。遂蜂擁而入。公發火自戕。一營皆燼。賊衆之先入者。亦隨而殲。實五月五日也。向節帥以聞。詔贈公武功將軍。公之遣裨將也。裨將謂公顏色不至被禍。公笑曰。臣之死忠。臣之不幸而幸也。豈有顏色或異者。子有老母。子爲我求救可乎。裨將歎息泣數行下。遂躍馬突圍而出。裨將姓蘇。名如松。丹徒羅志讓爲之紀略如此。

### 李帥戲稱文蝦

粵賊十餘萬自蘇來。分十二枝。四面馳突。圍程軍門學啟新橋營數十匝。李帥聞之。親勒兵馳救。所部卒離皖數月。不得一當賊。至是勇氣百倍。軍門望見帥旂。亦突圍

夾擊。我兵無不一當十。賊大敗奔還。是役也。有一卒殺數十人。最後遇一悍賊。鏖戰良久。兵刃俱折。至以手相搏。互殞於地。賊取其斷刀。刎其頸。卒亦以拳搥其胸。正危急間。忽見賊失其首。躍起驚視。則一卒手斬賊頭去矣。李帥嘗言前數年以編修從軍。每親出擊賊。軍中呼爲武翰林。我戲應之曰。僕乃文蝦耳。蓋滿洲中稱侍衛曰蝦。新武進士入侍衛學習者曰拉蝦也。先是外國人輕中國兵以爲無用。至是戰乃稱中國有人。

### 江忠烈公之殉難

新寧江忠烈公忠源。生平忠孝大節。出於天性。猿臂長身。目炯炯有神。顧盼磊落。與人交。披肝瀝膽。終始不渝。尤愛才服善。聞人孝友節義事。務成就闡揚之。嘗以公車至京師。曾文正公目送之曰。此人必立名天下。然當以節烈死。是時天下尙承平也。後江公知浙江秀水縣事。卓著循聲。丁憂歸里。會廣西洪楊等賊。勢熾日張。江公出參副都統烏蘭泰公軍事。甚相契洽。烏公既遇伏殉難。江公遂自募楚勇千餘人。與

賊搏戰。楚勇出境。勦賊由此始。廬州知府胡元煒。具稟告急。詭言廬州糧械極富。團勇多而得力。江公以爲廬州重地。有可守之資。而棄之可惜也。乃分所部之半。留守六安。自率其半。馳赴廬州。問元煒以守具。則糗糧軍火。一無所有。守城兵僅元煒腹心徐淮所募勇。及公所募六安勇。各數百人。皆新集不足恃。廬州城大而圯。兵勇人數。不敷一門之守。江公悟爲元煒所紿。且知廬州城萬無可守。然旣已至廬。不肯爲棄城退守計。又怒元煒不能布置於平日。復詭詞貽誤於臨時。每見必斥責之。元煒遂伏匿不敢出。江公巡城。見水西門枕高阜。環城一面皆山。度賊必據山俯攻。因部分文武吏守城。而自守水西門。下令有能助守城者。悉聽廬民赴之者。萬餘人。部署稍定。越日賊大至。環城急攻。駕雲梯攀堞。官軍屢擊卻之。賊穴東城威武門爲隊道。公募死士迎隧出。有賊黃襦據隧口下窺。外委馮貴引刀劈削其面。賊驚譟。官軍自城上擲火彈擊之。皆反奔。公守水西門。賊據山引矢射及公幄。公久病。益不支。衆力請公宿城下。賊復穴水西門。伏地雷轟城崩數丈。公躍而起。手大旗緣堞上督衆連

賊目堵築關口。會援師數道。皆爲賊所敗。城中勢益孤。元煒部勇分守北城拱宸門。勇首徐淮。故縣役也。素無賴。與賊交通。夜開門引賊。城上兵與賊鏖戰。竟夕。天且明。霧蔽。蔽如雨。江公左右擁公行。公手劍自刎不殊。都司馬良勳負公疾馳。公齧其耳。良勳負痛。因墮地。至水關橋。自投古塘死之。從公死者曰布政使劉裕珍。知府陳源。兗同知鄒漢勳。胡子雝。副將松安。都司馬良勳。戴文瀾。縣丞艾延輝。興福。時咸豐三年十二月十七日也。

### 科爾沁郡王之武勇

粵賊洪秀全之陷金陵也。遣其僞將吉文元。林鳳翔。李開方等。率悍黨萬餘人北犯。由皖入豫。由豫入晉。由晉入畿輔。連陷郡縣。裹脅日衆。而欽差大臣勝保。躡擊其後。頗有斬獲。圍之靜海。及獨流鎮。科爾沁郡王僧格林沁。統領蒙古諸部兵。及京營各將軍都統等。馳往會勦。適金陵賊遣其黨黃生才等。率衆北援。陷臨清州。脅從至五六萬人。勝保與領侍衛內大臣土默特貝子德勒克色楞等。督兵迎勦。賊無食可掠。

脅從者解散大半。沿途復被鄉團截殺。勝保晝夜窮追。至豐縣。勦滅全股。黃生才被山東官軍擒獲。伏誅。其靜海獨流鎮之賊。南竄阜城。僧邸追圍之。賊聞黃生才一股爲勝保所滅。相謂曰。莫余援也已。遂并力突圍。奪越三濠三壘。竄至連鎮。立木柵。掘深濠守之。復分其馬隊竄踞高唐州。當是時。吉文元已被吉林兵射死。林鳳翔在連鎮。僧邸圍之。李開方在高唐。勝保圍之。高唐賊衆皆百戰精銳。糧食充足。緣城複立木柵。悉用土壘。週挖濠溝。陷坑。又挖地窟。賊皆潛居。并有地道直通城外。每黑夜劫營。官軍頗有死亡。勝保鑄大礮。樹雲梯攻城。皆不能克。遂築壘挖濠以困之。僧邸以咸豐五年正月十九日。攻克連鎮。搜捕餘匪。悉數殲滅。惟不見林鳳翔。擒賊供稱。在窟室中。官軍窮搜得之。則見林鳳翔方在地洞。挾二美人宴飲。驩呼。已將長髮薙去。蓋欲乘閒潛逃也。遂與其黨十一人。一并生擒。解京誅之。僧邸晉封博多勒噶台親王。卽移得勝之師。馳赴高唐。自德貝子以下。俱受節制。勝保以師久無功。逮京治罪。僧邸故撤高唐南面站牆兵勇。誘賊出巢。賊果出城。棄其馬隊。全數步行。竄踞馮官。

屯屯距高唐四十五里。距荏平十八里。賊脅民夫用各種大木器週圍堵住。內又掘掘陷坑。排列槍礮。守禦嚴密。屯內本多豪富。皆高樓大廈。外甃甃牆。十分堅固。礮不能入。僧邸追至屯外。用馬步隊圍賊。圍自持旗登樓眺望。見清兵近前。卽放槍礮。勢難驟進。僧邸相度地勢。知非水攻不可。卽擬引運河水以灌之。衆謂屯中地勢墳起。恐非水力所能及。僧邸內斷於心。神機密運。先於屯外週築圍牆。牆外掘濠溝。甚寬廣。又以掘濠之土。加倍內牆。布置周匝。旋據已革廣西左江道張晉祥稟稱。願捐貲獨任其事。僧邸許之。遂挑挖運河。自東昌三孔橋起。至馮官屯石橋止。共一百二十三里。計長二萬二千一百七十六丈。口寬一丈七八尺。底寬六七尺。深五六尺不等。計需工價京錢五萬二千餘貫。自二月初旬起。至三月初四日工竣。竟引水入濠。僧邸旋卽飛飭僱集民夫二三千人。或用水車。或用水斗。灌入牆內。牆外築墩。排列鎗礮。一面令兵勇站立瞭望。防賊突出。挖牆倒浸。一面督役晝夜輪流灌注。不息。由是漸灌漸滿。牆內水深三四五尺不等。賊穴糧草。火藥盡溼。賊聚居樓上。清兵用礮不



時轟擊賊之柴米漸乏。勢甚窮蹙。四月十三日已刻。李開芳遣其心腹百餘人混入難民內。泅水出降。意欲藉爲內應。僧邸心知其僞。訊出被脅難民。遣回原籍。其餘賊黨一百四十餘人。分撥各營。乘夜盡誅之。遂令兵勇越牆逼近土堰。放火燒燬賊巢。賊萬分窮蹙。十六日黎明。僧邸又令兵勇越牆四面進攻。忽大風驟起。飛沙揚塵。瞬息不辨南北。僧邸卽命撤隊。已刻李逆遣一賊呈送降稟。僧邸諭令限本日午時先繳軍器。方准投誠。約半時許。果來繳軍器。遙見賊隊數十人。高張紅傘。擁李逆前進。志在乘此脫逃。僧邸偕德貝子等逆探其詐。暗令馬步隊數萬人。張左右翼以待之。李逆旣入穀中。遂與其黨八十八人。俱在濠邊擒獲。僧邸傳令將八十八人撥入各營。其賊目八人在營外帳棚守候。但令李逆進見。李逆頭戴黃綢繡花帽。身穿月白綢短襖。紅綢褲。紅鞋。年約三十二三。攜兩賊童。身穿大紅繡花衣褲。紅鞋。年約十六七。美如女子。左右揮扇。隨李逆直入帳中。李逆僅向僧邸德貝子等各屈一膝。卽盤腿坐於地。兩童東西侍立。帳內總兵以下。皆持刀環立。怒目視之。李逆與二童仰面

四顧毫無懼色。但稱能寬貸其罰。願說金陵諸賊來降。並求賜飯。遂開懷大嚼。笑語如常。旁若無人。僧邸知其心叵測。飯畢遣出。又令八賊目進帳。皆跪見求赦。亦卽遣出。遂將李逆與八賊目解至京都。凌遲處死。僧邸查明連鎮高唐馮官屯三處陣亡官弁兵勇八千餘人。設立祭案。將就擒餘匪八十人。並二賊童。網縛挖心祭之。作祭文曰。爾官爾民。爲國忘身。沙場戰死。陰靈未泯。天鑒爾志。振我軍聲。渠魁旣殲。賊黨悉擒。剖其心肝。慰爾忠魂。尙饗僧邸放聲大哭。官弁兵勇無不墮淚。僧邸前經晉封親王。於是奉旨世襲罔替。並賞肩輿。其餘文武各員。賞賚爵秩有差。

### 金陵之攻克

宮保威毅伯曾公之圍金陵也。猛攻二年。盛暑鑿兵。迄不能下。自朝陽門至鍾阜門。開地道三十三處。篝火而入。地崖崩而窟塞。則縱橫聚葬於其中。賊或穿隧以迎我。薰以毒煙。灌以沸湯。則趨者倖脫。而愨者就殲。蓋每穿一穴。爲賊所覺。而將士須臾殞命者。率常數十百人。一日穴地已過城根。賊尙未覺。會賊有以槍插地者。穴內軍

士見槍首入地。疑賊已覺而刺之也。急以手引槍入地數尺。賊始知官軍在地下。復迎擊之。官軍或退或死。復開地道。或爲山石所隔。或將近城根。賊酋李秀成登陴遙望。見其上草色。輒知下有地道。官軍旣克僞天堡城。卽所謂龍膊子者也。在太平門外。高踞鍾山之頂。俯瞰城中。提督李臣典等與公密商。排巨礮三層於其上。晝夜對城轟擊。無一息停。城堞皆頽。賊不能立足。曾公始下令軍士各持柴草一束。擲之城下。高與城齊。示將由此登城者。賊併力嚴備。不暇他顧。又隔於柴草。不能瞭望。官軍於近城龍膊子山之下。覓得一隧。乃前數月所開。爲賊所覺。而中廢者。曾公知賊不復防此道。派千人由此挖至城下。實火藥三萬斤於其中。封築完固。填以大石。口門留一穴。以粗竹數丈爲引綫。貫入穴中。竹內用大布數匹。包火藥實之。及期各軍嚴陣以待。火始入時。但聞地中隱隱若雷聲。約一點鐘之久。俄而寂然。衆又以爲不發矣。忽聞霹靂砰訇。如天崩地坼之聲。城垣二十餘丈。隨煙直上。萬衆屬目。咸見是城聳入雲霄也。大石壓下。擊人於一二里外。死者數百人。諸軍由缺口衝入。其上有黑

雲一陣隨之。既而城中火起。共見火光中有若金星一箇。騰入雲端。繼有白光一道。衝上。蓋皆寶氣所化也。先是咸豐三年。粵寇之陷金陵也。募得一黔人善掘煤者。掘地道自儀鳳門入。及官軍圍金陵。黔人復在軍中。曾公使挖地道自太平門入。噫。一省垣也。而得失係於一挖煤者之手。亦異矣。曾文正公既至金陵。修治缺口。鑿石識其處。銘曰。窮天下力。復此金湯。苦哉將士。來者勿忘。

### 得勝口之戰績

咸豐三年。粵賊北犯畿輔。長蘆鹽運使楊需。爲防禦計。捐廉製洋槍五百桿。招募壯丁在署教演。號曰蘆團。旋奉旨派前任浙江巡撫梁寶常等。協同天津地方官辦理團練。闔縣紳商立義民局二十八處。每局五六十名。按期訓練。縣人張錦文者。前爲麟見亭河帥家丁。爲司庖政。繼以鹽筴致富。倡捐團練經費。並上守禦策於鹽政文謙。鹽政善之。發令箭一支給錦文。俾籌布置。錦文自練壯丁三千名。號曰鋪勇。當是時。天津鎮協各兵。連年徵調在外。城中惟有蘆團鋪勇。而義民二十八局。散布一縣。

通計惟有數千人。天津地平衍無險可扼。悍賊七八萬由南而來。自春徂秋。寇氛日逼。民心大震。八月朔夜。疾風甚雨。城西芥園河隄驟決。天津道張起鵠督率官弁馳往堵築。見有紅燈隱隱前導。奔流隨之。此隄高與城齊。地勢東窪西仰。乃水不東趨。反灌西南。居民廬舍無恙。而城南彌望汪洋。倏成巨浸。靜海滄洲來路及諸歧徑。皆沒於水。僅存大道而已。決口前一日。隄上有二人徘徊往來。一人曰。當在何處。一人指曰。此處即可。衆咸異之。次夜隄潰。卽所指處也。九月二十六日。偵知賊已入滄洲境。錦文夜謁縣令謝子澄曰。寇逼矣。當奈何。謝公曰。無餉無以辦事。爲之奈何。錦文獻票錢四千緡。爲募勇費。且謂賊勢鴟張。非遏其銳氣不可。明日募夫萬餘。掘長濠於小稍直口。復以席裹土如鹽包然。疊成礮臺。置礮盤六座於臺上。卽日工葺。錦文入見。縣令告之曰。昨夜獄犯喧譁。恐生變。奈何。錦文曰。莫若擇其罪不至死者出之。激令殺賊贖罪。從之。回民劉繼德者。甫出獄。振臂一呼。回民奔集者千餘人。遂率赴教場聽令。適錦文豫引鹽課銀二萬兩至。儘數易錢。分寫小票以絡勇糧。官紳議誰

可督隊者。謝公奮然請行。衣短後衣。持槍上馬。率練勇至城西小園駐焉。先是邑人賈慶堂獻策。恐賊於水淺處偷渡。村民有弋鳧者。善用排槍。置小舟上。覆以席。推行水中。百發百中。僉呼之爲雁戶。宜招募設伏以備不虞。官紳皆以爲然。倉猝募五百人。是日使慶堂率往。伏於稍直口之東南。二十八日闔郡文武齊集教場。忽一老人來營曰。賊已在城西黃家墳造飯矣。言訖不知所往。登臺瞭望。果蜂擁而來。謝公率衆迎勦。蘆團擡槍。乘勢堵截。縣民數萬。持械相助。賊首名小禿子者。矯健絕倫。賊中呼爲開山王。手執黃旂。左右指揮。迅奮剽疾。清軍以火槍擊之。擊上則鼠伏。擊下則揉騰。槍甫止則隨煙而進。有大沽老卒。喑曰。是賊狡猾。非巧取不可。乃以兩槍上下交擊之。立斃。則氣奪。猶奮突而前。至設伏處呼渡。雁戶佯應。推舟前行。拒前數武。號鑼一聲。排槍轟發。賊紛紛倒地。驚以爲水雷。遂大潰。是役也。賊因水阻迂道東走。僅遲至一日。而稍直口得以爲備。且歧徑皆淹沒。可豫料賊所至。而以全力專備一路。斬賊五百餘級。而清兵勇無一傷者。由是小稍直口改名得勝口。旌戰功也。是時惜

無大軍夾擊。不能一鼓殲賊。又以賊衆我寡。未敢遠追。賊遁至楊柳青。旋據靜海之獨流鎮。十月十七日。督師大臣勝保。始統大兵由深州至天津。旋赴獨流鎮。勦賊。並調謝公至大營。辦理糧餉。帶練殺賊。十一月二十三日。副都統佟鑑擊賊獲勝。殺數百人。因拽取濠板被賊擁圍。手執長矛。殺賊數人而死。謝公馳往援救。身受七傷。赴水而死。勝保奏聞。得旨。謝子澄著贈布政使銜。卽照布政使陣亡例賜卹。並給騎都尉世職。入祀京師昭忠祠。准於四川原籍建立專祠。佟鑑謝子澄並准於天津陣亡地方合立一祠。謝公旋予謚忠愍。而天津紳民先於西門外雙廟街建立謝公祠。光緒六年始合祀。修公改號雙忠祠。

### 陳國瑞之暴戾

已革記名提督處州鎮總兵陳國瑞。年十餘歲。爲粵賊所虜。旣而降於官軍。總兵黃開榜。養爲義子。隸大帥袁端敏公甲三部下。未及弱冠。積軍功至都司。然慄悍不馴。動輒犯法。是時吳勤惠公棠。以漕運總督駐節清江浦。索將於臨淮大營。端敏乃以

國瑞予之。始將七百人。與捻寇追逐於淮揚徐海之郊。每戰輒勝。威名日隆。吳公既倚爲長城。壹切順其所爲。如奉驕子。漸增募其衆至二三千人。復隸故科爾沁忠親王麾下。掃蕩練匪苗霈霖。及山東白蓮池教匪。皆以國瑞爲首功。積官至記名提督。處州鎮總兵。幫辦清淮軍務。國瑞益自鳴得意。令軍中稱己曰大帥。自謂名位與吳公相並。有輕之之意矣。忠親王戰沒曹南。諸將皆以不能救護主帥獲罪。國瑞獨以戰功素著。免予議處。時曾文正公督師北上。適劉省三軍門銘傳克復濟甯之長溝。國瑞率軍後至。見淮軍將士所攜洋槍精利。心獨豔之。國瑞向以黠悍自雄。諸將無敢與抗者。既惡淮軍之先入長溝也。又思奪其利器。自率親兵五百人突入長溝。見淮軍勇丁卽殺之。凡殺數十人。劉軍門聞變。親督所部與戰於塞中。淮軍盡攜火器發無不中。國瑞親兵多執長鎗。狹巷中不能轉掉。五百人皆殲焉。國瑞躍登民屋。劉軍門使其衆梯而執之。置之空樓三日。給以糜粥。使饑而不至於死。國瑞見軍門泣曰。此五百人皆數年來所糾合四方之精銳。一旦爲君所殲。吾軍從此衰矣。軍門乃



憐而釋之。於是劉陳二人皆稟訴於曾文正公。互相指訐。文正惡國瑞之獷也。欲摧其盛氣。而磨勵陶成之。凡批牘數千言。大旨獎其長而戒其短。歷舉其罪惡十餘事。俾速自悛改。且明白稟覆。並勸其去欽差字樣。勿與英康兩軍同紮。勿擾民。勿梗調。勿私鬪。勿虛報勇額。國瑞具稟。詞多巧飾。不肯任過。文正歎曰。是真不可教也已。乃具疏彈劾。撤去幫辦軍務名目。革去提督。褫去黃馬褂。仍留處州鎮總兵。以示薄懲。而觀後效。國瑞悚息聽命。馳往徐州。謁見文正。受約束維謹。旋復還駐清江。國瑞馭下嚴酷。手刃膳夫不下百餘人。將士無罪被殺者不可數計。國瑞有養子曰陳振邦。亦積功至總兵。一日國瑞忽欲殺之。振邦求救於漕帥吳公。爲之緩頰。國瑞不聽。振邦乃走匿漕帥署中。國瑞再三索之不得。自率親兵數百馳赴帥署。欲掩執振邦。時已二鼓。署中聞變。急閉大門。國瑞督兵攻之。守門者在內叱曰。汝輩漕帥卵翼扶持。以有今日。乃敢反耶。國瑞怒曰。以子叛父。非反而何。吾捕反父之子。且討匿反賊之人耳。力攻久之。破大門而入。復攻二門破之。署中人退守宅門。其堅過於大門。國瑞

猛攻不克。然署中人情愈急。罵愈厲。國瑞益怒不可忍。自以頭觸門。痰湧氣厥。頽然仆地。吳公乃命開門。使數人舁國瑞置一古廟中。派員看管。而檄別將代統其軍。疏劾國瑞革職。永不敘用。越二年。捻酋張總愚馳突畿輔山東。是時醇邸方領神機營。密薦國瑞。欲倚以辦賊。復召爲頭等侍衛。俾募數千人討賊。國瑞之復出也。頗染鴉片烟癮。兼有好色之稱。銳氣已大不如前。而性情驕暴如故。倚恃邸眷。凌侮諸將。遇欽差大臣恪靖伯左公營中所運餉銀軍械於中途。擅自截留。左公具疏劾之。請以都司降補。奉旨留中。而命國瑞歸左公節制。國瑞上書左公。歷數其短。如排擊曾文正公爲背恩。裁抑鮑超。蔣益澧爲攘功等語。指摘不遺餘力。而密致其稿於醇邸。醇邸奏之。朝廷慮國瑞不復能爲左公用。乃命改歸安徽巡撫英公翰調遣。越日復改歸山東巡撫丁公寶楨調遣。旣而連次改隸。大學士官公文將軍都公興阿部下。最後隸欽差大臣肅毅伯李公部下。國瑞軍實無戰功。而捻寇適全股蕩平。國瑞亦獲受上賞。開復記名提督黃馬褂花翎勇號。并賞雲騎尉世職。諸軍旣皆凱撤。國瑞往

來南北。庚午天津焚燬教堂之案。洋人以其激怒津民。至殺領事豐大業。檄索陳國瑞甚急。賴曾文正公嚴詞駁斥。倖得無事。國瑞乃寓居揚州。與提督李世忠過從遊。先是國瑞在清淮時。嘗截留李世忠營中餉鹽值銀鉅萬。又殺世忠部將之攻下蔡墟者。取其軍械而誣其勾通苗需霖。世忠皆不敢與校。及是欲洩宿憾而陽與爲驩。國瑞不悟。日與狎飲。時時以戲言謔之。世忠積不能平。一日清晨。率親兵數十突入國瑞之舍。擒國瑞以出。聲言解往金陵。聽總督曾侯相處置。挾以登舟。揚帆南下。國瑞之兄子陳澤培率衆追之。是時湖北運銅船數百號停泊河干。其水手皆楚人。國瑞同鄉也。澤培號於衆曰。孰能追奪吾叔者。賞以萬金。於是應募者數千人。追及世忠於瓜州之四里舖。圍其大舟。世忠乘夜挾國瑞登舢板。礮船潛行出口。溯江西上。黎明澤培登其大船。取世忠妾婢三人。以歸揚州。扶以遊街。官吏馳往彈壓。送歸世忠本宅。而船中尙有二女。於紛呶之際。懷金寶赴水以死。曾文正公既接世忠稟牘。嚴批責令先釋國瑞。來轅聽候訊辦。世忠泊舟蘆葦叢中。先自來謁文正。文正拒

不見遣武弁以一令箭。偕世忠同至礮船。釋放國瑞。始於船底掖出之。饑憊幾無人形。時同治十年閏四月十八日也。李陳二人同交營務處委員訊具供詞。文正衡情剖斷。世忠以擅執大員被劾褫職。國瑞累次滋事。又濫殺世忠部將。因事在赦前。劾以都司降補。均交地方官嚴行管束。澤培革去監生。時議允之。越數年。國瑞復以詹啓綸殺人之案。讞有唆聳主使等情。發往黑龍江充當苦差。其後廷旨密詢吉林將軍云。陳國瑞是否尙堪起用。將軍覆奏。謂陳國瑞兇暴桀驁。不堪復用。論將材者皆以爲定評焉。

### 錢江之創釐捐

錢東平江者。浙之歸安人也。負才使氣。斲弛不羈。有俯視一世之概。故無鄉曲譽。薄遊廣東。亦落落寡所合。會林文忠禁煙。英夷肇釁。江心憤其事。遂集衆舉義。與夷爲難。所作檄文。多所指斥。大府惡之。坐以法。遣戍新疆。當未至之先。新疆諸人固已聞其名矣。既抵戍所。自將軍以下。皆折節與交。江口若懸河。議論激昂慷慨。同人皆推

服之尊爲上客。未幾遇赦歸。歸後又遊京師。出其縱橫捭闔之說。遂名動公卿間。或勸以仕。江不應。頗以魯仲連自命。時值粵賊陷金陵。世事孔亟。江曰。此吾錐處囊中脫穎而出之時也。遂乘薄笨車出都。出都日。送者車數百輛。極冠蓋之盛。其時副都御史雷公以誠辦理糧臺。開府邵伯埭。江懷刺上謁。抵掌而談。雷公大悅。辟至幕府。幾於一則。仲父再則。仲父之契焉。當是時。江北屯兵數萬。儲胥甚急。公以轉餉爲職。而各省協餉不至。空手不名一錢。庚癸頻呼。行有脫巾之變。焦愁仰屋。莫展半籌。江爲之畫策。疏請空白部照千餘紙。以勸捐軍餉。隨時隨地。卽行填給。與從前繳銀累載。奏獎不聞者。迥然不同。富人朝輸貨財。夕膺章服。歡聲載道。踴躍輸將。不旬日。遂得餉十餘萬。又創立抽釐法。於行商坐賈中。視其買賣之數。每百文捐取一文。而小本經紀者免。居者設局。行者設卡。月會其數。以濟軍需。所取甚廉。故商賈不病。所入甚鉅。故軍餉有資。源源而來。取不盡而用不竭。不期月。又得餉數十萬。資用旣裕。兵氣遂揚。江上諸大帥倚雷公若金城。而公亦視江如右手矣。當是時。江之名聞天

下。然江恃功而驕。使氣益甚。玩同幕於股掌。視諸官如奴隸。咄嗟呼叱。無所顧忌。於是上下交惡。譖毀日至。雷公亦稍稍疎之。膠漆而冰炭矣。江愈怒。卽於雷公亦面加譏斥。雷積忿日久。第歛其才。姑含容之。一日飲次。議論相左。雷加誚讓。江使酒大罵。雷怒甚。在旁者又慫恿之。立卽斬首。乃以江跋扈狂肆。將謀不軌。奏焉。錢江旣創立釐捐法。各直省皆仿照行之。曾文正公尤以爲善。謂軍餉無出。與其病農。不如病商。蓋擇禍莫若輕之意。非眞以釐捐爲必可行也。軍興二十年以來。不加賦。不勒派。而卒成勘定之功者。釐捐之力居多。余自咸豐初年。奉檄餉局。首則捐輸。繼而助餉。又繼而米捐。舌敝耳聾。異常困苦。恨聲不絕。所得無幾。自釐捐法行。商賈不無怨謗。其有以刻爲能者。尺布斗粟。併計起捐。碎物零星。忘報卽罰。此是關市之暴客也。其有營私爲己者。得費免捐。公然賣放。收錢不報。暗地侵吞。此是國家之盜臣也。兼之設卡已多。立法益密。大小委員。一局三四輩。巡丁司事。一卡數十人。人數猥雜。局用益大。所入不敷。則不得不加意搜求。再人之賢者少而不肖者多。查察不及。弊端百出。

既爲暴客。又爲盜臣。而商賈徒耗其財。餉需仍無有濟。言之可爲痛恨。雖大吏時加檢攝。有犯必懲。而吞舟之漏者。又不知凡幾。此固非江創法之初心。然江則爲其濫觴矣。

### 王武愍公之殉節

無錫王武愍公恩綬。年少爲蘇撫林文忠所賞識。招入節署讀書。文忠稱爲篤實君子。道光二十九年。舉北闈。充宗學教習。時惠邸奉命稽察。語人曰。不視此職爲具文。孜孜不倦者。王教習一人而已。年滿。以知縣揀發湖北。咸豐六年二月。抵武昌。值粵賊上犯。城閉不得入。胡文忠方帥勇駐沌口。留公於營。已命支行帳矣。公曰。爲楚吏。義當入楚城。遂縋以入。當是時。饜匱援絕。巡撫以下。皆束手待盡。屬吏多借符檄出城。公入謁。撫臣陶文節公。及武昌守恭節公多山。皆咄咄驚咤曰。此且夕死地。人患不得出。君獨患不得入。此何時。有此義烈男子耶。仍令出就胡營。公涕泣持不可。翌日。城破巷戰死。公子燮。二僕丁吳。皆從殉。

## 曾文正之屢瀕於死

咸豐四年春。粵逆陷湘潭。圍攻長沙。曾文正檄塔忠武帥師復潭。復躬率水師。及賊於靖港。戰失利。投水者二。幕客掖以起。公終以事不可爲。遂止。妙高峰。草疏及遺屬。凡二千餘言。密令公弟靖毅公貞幹市櫬。將以是夕自裁。會湘潭捷書至。乃再起視事。然仍以師不全勝。自劾。時詬謗叢集。湘省藩臬糧鹽諸使者。至會牘上。巡撫劾公。公姑忍之。按公仗鉞十四年。九江祁門。及是役。皆屢瀕於死。設當日竟如公志。成仁取義。公則何憾。藩臬諸君。亦所快心。其如東南百萬蒼生何。

## 三河死事之慘

咸豐時。湘楚二軍崛起。楚軍健者爲江忠源。湘軍則羅澤南。及其弟子李續賓也。李少受學於羅。咸豐三年。羅募勇出征。李從之。羅將中營。李將右營。解吉安太和等處圍。五年。信州告警。又與羅自潯馳援。克廣信府城及弋陽等四縣。東路甫定。遂建西援武昌議。大捷於義甯。下崇陽。通城。抵武昌。巡撫胡林翼大喜。事無巨細。惟羅李二



人是聽。六年。羅中槍不起。李接統全軍。再克武漢。援九江。九江守將林啟榮者。堅忍得衆。內與小池口湖口梅家洲諸處。首尾相救。外與皖廬諸處。互爲聲援。李旣築長塹以圍潯。又分軍援江左。襲湖口之背。立下兩城。明年卒克九江。於是浙人官京朝者。疏請敕李東兵以紓浙難。而胡林翼以皖中糜爛。請留李軍。圖皖以固鄂。廷議許之。李乃整旅入皖。連下潛山太湖桐城舒城四縣。師次三河。時李所部僅五千人。洪軍健將陳玉成李世賢等。共十餘萬。連營數十里。先截清軍糧道。而四面環擊之。李軍銳氣日蹙。師半潰。諸將議退守桐城。李曰。軍有進無退。當死戰。俄敵揮兵蝟集。李自度事不可爲。夜半。怒馬陷陳死之。時八年十月初十日也。諸將堅守營壘。又三日俱敗。又六日桐城守兵亦敗。前後死者。殆六千人。曾國藩弟曾國華。知府何忠駿。知州王揆。一楊德閻。道員孫守信。丁銳義均殉焉。

### 何桂珍之冤死

曾國藩何君殉難碑記云。軍興十載。士大夫橫死者多。獨我友何君丹畦。尤深痛不

忍云。并謂自古以來。未有行善獲禍。如是之烈。按何師宗人。由翰林出爲徽甯道。時皖中糜爛。何當之官。不克南渡。巡撫福濟檄何募勇出征。公私匱乏。最後得二百餘人。帥以西招降。擒服李兆受馬超江等。先是大府檄何援廬州。檄未至而廬陷。劾何落職。以孤軍轉戰英霍間。八閱月。僅支餉三百金。不足供一夕炊。又益以李兆受降衆。絕糧久。怪何無以活之也。而各疆臣又恐兆受反復。陰使何圖之。書爲兆受得以何賣己也。戕之。焚其尸。

### 勝保之死當其罪

胡林翼致曾國藩書云。勝帥以招降爲得計。亦今之熊文燦耳。勝帥者勝克齋也。以庚子舉人。外班翰林。洊至內閣學士。文宗登極。上書論南北形勢。上嘉之。委以軍務。豐縣之役。頗著戰功。迨督師數省。漸露跋扈。在皖招降。擒股張澂。澂妻有姿色。出入轅門。達旦不出。醜聲四播。四眼狗擒後。餘黨不多。勝不擊。安坐潁州。致賊勢蔓延。擾及關內。苗沛霖橫行江淮。勝養癰貽患。由皖而豫而秦。貪劣不可勝數。同治十年。奉

旨革職。拏問。供詞狡展。給事中趙樹吉。御史劉其年。連疏糾劾。清帝動容。賜勝自盡。其纒首也。大學士周祖培。奉派傳旨獄中。勝直前牽衣哭曰。中堂許某臨刑呼冤乎。周窘甚。退門外曰。我不管。我不管。初內外諸臣。交章劾勝。而首先舉發者。光祿卿潘祖蔭也。

### 捻亂統兵大臣表

| 名姓  | 官爵    | 年份   | 駐紮地      |
|-----|-------|------|----------|
| 周天爵 | 欽差大臣  | 咸豐十年 | 宿州       |
| 呂賢基 | 工部左侍郎 | 同治二年 | 安徽原籍     |
| 陸應穀 | 河南巡撫  | 同治二年 | 開封       |
| 舒興阿 | 陝甘總督  | 同治三年 | 陳州       |
| 袁甲三 | 欽差大臣  | 同治三年 | 宿州周天爵卒代之 |
| 曾國藩 | 欽差大臣  | 同治三年 | 江甯       |

|      |      |      |      |
|------|------|------|------|
| 英 桂  | 河南巡撫 | 同治四年 | 開封   |
| 武隆額  | 安徽提督 | 同治五年 | 亳州   |
| 勝 保  | 欽差大臣 | 同治七年 | 督江北軍 |
| 史榮春  | 提督   | 同治八年 | 曹州   |
| 田在田  | 總兵   | 同治八年 | 兗州   |
| 邱聯恩  | 總兵   | 同治八年 | 兗州   |
| 伊興額  | 都統   | 同治九年 | 宿州   |
| 關 保  | 協領   | 同治九年 | 河南   |
| 德楞額  | 協領   | 同治九年 | 曹州   |
| 毛昶熙  | 團練大臣 | 同治十年 | 河南原籍 |
| 僧格林沁 | 蒙古親王 | 同治十年 | 山東   |

殺降之無理

當洪軍大挫蘇州也。李秀成大舉圖恢復。使部將合無錫宜興各處兵八萬。船千餘。屯運河口。而自領精銳據金匱援蘇。與清兵連戰。互有勝敗。李鴻章親督大軍。程學啓戈登爲先鋒。進迫吳門。破其外郭。秀成與譚紹洸入內城死守。既清軍水陸合圍。城中糧盡。秀成裨將郜雲官汪有爲等八人。潛通款於學啓。學啓與戈登乘輕舸。造城北湖濱。與八人面訂降約。使殺秀成。許以二品賞。戈登爲保人。然雲官等終不忍害秀成。乃斬紹洸開門降。秀成夜出城去。時八人所部尙十餘萬。學啓既許以總兵等職。求如約。學啓與鴻章謀。終以此等狼子野心。久後難制。乃設宴坐艦。邀之。號砲一起。伏兵殪之。並殺其黨千餘。蘇州定。戈登聞李之食言也。大怒欲殺之。携短砲伺李知而避之。數日怒漸解。乃止。（按八人一爲納王郜雲官。二爲比王伍貴文。三爲康王汪安均。四爲寧王周文佳。五爲天將軍范起發。六爲天將軍張大洲。七爲天將軍汪環武。八爲天將軍汪有爲。）

賈令之先知

道光丙午丁未間。西南近事孔棘。貴州民苗雜處。盜賊接踵。以燒香結會爲名。而黃平天柱等寨尤著。苗人滾山越洞。曲折相通。官兵不能深入窮搜。故猝難剿滅。湖南則貪黷之吏。抑價平糶。致奸民李沅發揭竿而起。桂平富民韋正室。懸登仕郎額。屢遭差役訛詐。亦倡亂僭稱爲王。故永昌新甯之間。囂然不靖。而廣西洪秀全陰與聯絡。聲勢日盛。某縣令賈公。知其不軌。將爲大患。誘而禽之。並搜獲逆書數卷。人教名冊十九本。白狀大府。語治其黨。時巡撫鄭祖琛。高語鎮靜。專尙慈祥。每戮一人。誦佛三日。至是得賈令稟。躊躇不能決。賈曰。秀全耳目甚衆。公視其罪可殺。卽請殺之。不可。則不如釋之。若久繫獄中。防不勝防。某等性命不足惜。如城池百姓何哉。鄭曰。窮治株連。人命至重。宜且釋之。賈歎曰。購捕經年。釋之頃刻。此所謂縱虎入山。爲患無已者也。秀全旣出。如獲再生。自以歲值丁未。適應紅羊之劫。造具火器。反志益堅。始與官兵爲難矣。鉢池山農曰。吾聞滑縣之亂。知縣事強公克捷。密捕賊首李文成下獄。刑斷其脛。故衆賊以倉皇起事而敗。四川新兵之變。道府營弁皆遁。知達縣事余

公永齡朝服升堂。諭令釋械出城。受約束。而倉猝之亂。以平濟時應變之才。卓乎不可及。已。強公既死於難。詔贈布政使銜。建祠。予謚。蔭及子孫。而余公亦受朝廷特達之知。洵擢府道。賞雙眼花翎。酬功之典。可謂懋矣。若賈明府者。獲展所長。事平論賞。雖與強余兩公。後先比烈。可也。不幸而遇疲輓。上官避咎包荒。畏蕙成性。遂致釀成巨患。塗毒十數省。傷殘數百萬億生靈。糜餉之數。不可稽。歷十四五年。而後定。而買公之不幸。其末焉者也。予故謹著其始。涓涓不塞。流爲江河。事機之來。間不容髮。惜哉。惜哉。

### 賊畏烏公

咸豐元年閏八月。廣西賊目洪秀全。攻陷永安州。據之。始建僞號。盡封諸酋爲王。王以下勳爵凡七等。設六官丞相司馬軍師旅帥等職。女官等次亦如之。行營五將軍。按水火金木土各司其事。僞天德王洪大全所定也。先是賊據金田。裹脅日衆。與鄉團兩不相下。僞東王楊秀清懼其離散。設計籠絡之。每自作巫。謂天父下凡附其身。

詞人陰私。發奸摘伏。羣驚爲神。又託天父言。挾制秀全。令前跪受杖。已則高坐。歷數其罪而責之。責已。仍奉秀全上坐。已有不韙。慮不足箝制其下。亦伏地令人杖之。不少貸。由是諸酋篤信其說。以爲真有天父鑒臨也。會官軍屢易大帥。惟提督向公。舊爲楊忠武部。老於軍事。謀略素優。此外則都統烏蘭太公。忠勇奮發。總兵秦定三。果敢善戰。故新墟雙髻山。莫家村。三捷。戰功爲最奇。賊之由金田移屯新墟也。定三自官甲潛行渡江。偵知竹園村樹木叢雜。斷樹截竹。拋棄各要隘。而伏兵村中。僅留一路。遣兵百人。僞爲樵採者。引賊入伏。前者突出。賊倉皇且戰且走。急從村後竄逸。則隘路竹木阻塞。後伏又起。大呼追擊。四面合圍。於是一日七勝。殲禽二千五百餘名。賊乃退據雙髻山。前此兵賊相遇。避道而行。其追逐官兵。顯與爲敵。自此始。雙髻山前以新墟爲門戶。後以猪仔峽爲藩籬。向公使諸軍圍其東南西三面。而自與都統巴清德合攻後路。既登猪仔峽。奪其要隘。賊自高擊下。銃礮木石如雨。清兵奮力抵禦。勢正不支。而前路諸軍已抵賊營。呼聲震山谷。上下夾攻。賊衆大潰。及據永安。



以大股分屯城外諸村。阻官兵進攻之路。距莫家村十餘里。有高嶺三。其中曰秀才嶺。尤爲險峻。烏都統相度形勢。遣隊誘賊。戒以俟賊漸近。沿左右二嶺。緩退過脊。嚴陣以待。而自率火器營。建中軍旗鼓於秀才嶺最高峯上。預埋地雷等火具。植紅蓋於帳前。賊至。左右營及中軍皆退。衆賊競前拔其紅蓋。火機忽發。全嶺崩裂。燔賊以數千計。大隊乘之。生禽無算。自是賊見烏公旗幟。輒不敢近城。賊亦有離心。獨大全秀清狡獪堅忍。死守不下云。

### 武昌之初陷

桂林長沙武昌同爲省會。同議固守。追賊者同爲向江諸公。而有陷有不陷。則機會利鈍異也。初粵賊竄攻桂林。向軍門自永安帥衆。介馬疾馳。繞出賊前。先一時入省會。賊營象鼻山。礮丸入城如雨。又製雲梯呂公車。薄城平攻。公與諸將晝夜守禦。以長竿縛火炬。竝煎松膠瀝糠爲餅。火之。煙障眯目。賊多墮死。此先聲奪人也。及入湖南。得船於全州。而賊勢一縱。結營於長沙之鰲山廟天心閣等高阜。江公忠源望見。

驚曰。賊據此。長沙危矣。急率所部爭之。賊少卻。遽趣移壘。壘距賊營數十武。共汲一井。擊柝聲相聞。自是長沙止南門受敵。向軍門又與部將張國樑等多方擾之。迫賊巢背水面城。當絕地。壘有斬擒。賊自彬州得採煤夫千人。仿鰲翻法穴地攻城。城蟄數十丈。副將鄧紹良大呼躍出城闕。手刃悍賊。後者復登復刃之。鏖鬪間。礮穿紹良右膊。屹立不動。弁兵奮力壘土築城。賊始退。此銳氣制勝也。方是時。僞王七人。大全已成。擒雲山及洪逆妹夫蕭朝貴。先後斃於礮。秀全慮人心渙散。取玉雕璽。謬稱天賜。脅衆呼萬歲。大搜民船。由臨資渡洞庭。而賊勢再縱。其鋒不可遏矣。岳州舊存吳三桂軍械礮位。盡爲賊有。漢口爲數省通衢。百貨山集。焚掠五晝夜。以浮橋徑達武昌。向軍門又自湖南倍道追至。營於洪山。兵士戰轉三省。未嘗一日息。銳氣少衰矣。時大營與省兵爲賊壘所隔。勢不能合。軍門旣燬賊壘數十座。殺斃及驅溺死者無算。屍骸枕藉。河水爲之不流。日遣敢死士縋城而入。約兵策應。鄂撫常公大淳欲出戰。而守令以民志未孚。慮其驚潰。欲俟客兵抵城下始出。軍聲旣鈍。示賊以弱。已而

寒雨大沛。火藥不燃。兵士攻剽經旬。亦極疲困。向公命收隊而城不保矣。

### 清河令之權術

粵賊既破金陵。鎮江繼之。卽渡江陷揚州。遊騎於邵埭之南。淮人將遷。貴者歎於室。富者憂於門。貧而強者喜於道。奸謀詭計。至有不忍言者。清河宰吳公仲仙曰。是不可口舌爭也。戮二人。率數百人。疾趨至郡城。且曰。大兵至矣。偏張示諭。備供具以待之。清河人見之。曰。賊從南來。縣主方迎往。吾無憂矣。郡中人聞之。曰。吳公不妄言。必有大兵。姑且止。賊退。遷者反嚮之。強而喜者。嗒然釋械而歸。

### 九節銅轟

粵賊初陷金陵。聲勢極壯。環城皆堅壘。自大勝關至七里洲。賊舟聯絡不絕。向大臣結營孝陵衛。大小百數十戰。奪壘焚船。遣散難民水手以萬計。賊始斂戢。一日大霧。公令軍士僞爲賊裝趨其前。而伏兵於壘後。戒以聞礮齊發。腹背夾攻。賊大驚。自相蹂躪。死者無算。千總某左挾長戟。右持虎頭鉤。率衆躍馬登土城。盛氣剽洗。霧爲之

開及歸。袍袴皆赤。六人扶掖入營。向公大獎異之。親爲進食。又加九節銅轟於鍾山高阜。護以排銃。更番迭進。清兵乘勢攻儀鳳通濟門。城中火藥崩震。人聲沸騰。勢將驚潰。公望見賊衆如蝗如蟻。兵勇不敵其半。慮攻剿太急。則困獸竄突。所傷實多。且金陵殘破已甚。而蘇常完富。定計以力保東南爲上策。於是揮兵使退。築長圍以困之。尤專意扼守東霸。并會合鎮江軍力護下游云。

### 樓船

揚州城臨運河。城外地狹者。不過二三丈。鹽知事張翊國。使卒肩卒。梯城而登。賊衆自焚跑馬樓。受傷而返。營務諸員。遣勇士密量城垣高低。距河遠近。取上遊空運糧艘。於船尾支板。斜出二丈餘。累級而上。若雲梯然。預遣參將馮景尼伏兵東岸以待。屆期。令總兵雙來力攻北城。游擊師長鑣駕船至城東。船尾適倚便意。門女牆東岸亦直接船頭。賊衆初見船與城平。大駭而散。而景尼兵無一至者。賊復集。縱火焚船。雙來右骸中礮。昏瞶中再呼殺賊而殞。是役爲揚州軍第一奇策。誤於景尼一人。革

職不足蔽辜也。

### 楊彭嶺

征討粵寇。自長江。剏設水師。軍事始有歸宿。而水師統帥。惟陝甘總督善化楊公岳斌。原名載福。兵部侍郎衡陽彭公玉麟。忠勇樸誠。始終其事。其功績爲獨多。咸同二朝之詔令。曾胡諸公之章奏。及中外士大夫婦人。儒子之稱述。莫不以長江千里。再造於楊彭手。祺康按京口。爲長江咽喉。其地夙有楊彭嶺。康熙間。湯文正公嘗作游記。今載集中。惟公亦不解命名之何義。由今思之。偉人未生。嘉名先錫。青山無恙。戰跡常留。事皆前定。不信然歟。

### 左舍人薦江忠烈

湘陰左舍人宗植。今大學士恪靖伯兄也。少豁達。好談時務。歷贊大府帥戎幕。與伯相齊名。咸豐初年。洪楊起事。上命故相賽尙阿經略粵西軍務。時舍人方官京師。以賽相參佐非人。亟草牘力薦江忠烈公於壽陽相國。壽陽遂上達天聽。忠烈之轉戰。

數省豐功勁節。爲中興諸將眉目。實自舍人識拔始。

### 兩文節之取義成仁

錢唐戴文節公。以侍郎乞休。殉庚申粵逆之難。其絕命詩云。傷心蒿目挽時艱。八載籌防總汗顏。撒手白雲堆裏去。從今永不到人間。越歲辛酉杭州再陷。時張小巖編修洵奉諱家居。相助城守。城破。率妻子殉焉。張與公同縣。公投池。張亦投井死。張絕命詩。並有白雲堆裏吾將去。前輩風流有戴公之句。後經朝官請卹。亦諡文節。二公皆無守土之責。就義成仁。前輝後映。足爲湖山增色矣。

### 江南大營死事紀略

湖北提督向榮。四川成都人。由行伍從楊遇春。平滑縣賊有聲。積功至提督。粵西盜起。以宿將被命。與都統烏蘭泰分統左右軍。屢躡屢起。咸豐二年。督師江南。始至營鍾山。遏賊東竄。時兵不滿萬。又分援揚州東壩。徽甯等處。勢益單。六年四月。鎮江師潰。賊橫溢不可制。歛營次丹陽。圖後舉。會病發。薦張國樑自代。卒諡忠武。署江甯將。

軍蘇布通阿。滿洲人。隸向榮左翼長。從征江南。署江甯將軍。卒於軍。謚果勇。甘肅涼州鎮總兵馬龍。四川人。忠勇善戰。隸向榮右翼長。日夜謀攻。復不克。憤毆血卒。謚剛愎。候補知府謝繼超。廣西人。倜儻任俠。隨向榮征江南。總理營務。咸豐四年。粵人劉麗川踞上海。官兵攻之久不下。奉令招撫。被賊誘執。脅降不屈死。江蘇巡撫吉爾杭阿。滿洲人。咸豐二年。由工部郎中奉旨以道員揀發江蘇。署按察使。青浦民人周立春。鉤扇粵人劉麗川。連陷蒲東西六縣廳城。奉督府檄。率師復其五。授常鎮通海道。旋擢布政使。駐上海。勦賊。四年六月。授巡撫。斷賊糧運。五年正月克之。賞一品服勇號。幫辦向榮軍務。移攻鎮江。六年四月。僞東王楊秀清由金陵悉銳至。薄總兵虎嵩林壘甚急。聞報。輕騎突圍入。賊繞之數匝。糧盡。手發火鎗洞胸卒。謚勇烈。候補道江甯府知府劉存厚。四川人。上元江甯志作山東人。人貲爲刑部學習主事。咸豐三年。以侍郎王茂蔭薦。奉命從軍江南。八月。上海事起。率偏師克復青浦。功第一。以知府發江蘇補用。賞瑚松額巴圖魯名號。軍興文職。錫勇號。自存厚始。旋補江甯府。留勦賊。上海平。

以道員用。隨征鎮江。六年四月。吉爾杭阿既死難。護屍突圍出。遇害。江甯將軍和春。滿洲鑲黃旗人。深沈有將略。由湖南參將從廣西軍。升總兵官。與向榮分統漢滿隊。咸豐三年。奏派專攻鎮江一路。尋奉命赴皖督師。六年。向榮卒。由江南提督。佩欽差大臣關防。視師句容。始至。薦張國樑可大用。俾總統諸軍。壁壘一新。堅城迭拔。每報捷。推功讓能。其下樂爲用。七年。鎮江既克。用張國樑計。會師搗金陵。圍城築圍。賊屢撲屢却。勢窘甚。會浦口黃池溧水甯國諸軍失利。分兵往援。死傷略相當。士氣稍弱。十年正月。賊閒道陷杭州。尋由廣德掠東壩而西。饒道中絕。外圍壞。環營火起。與張國樑走鎮江。冀收合餘燼。未幾。聞丹陽失守。總督何桂清棄常州逸。殘軍瓦解。憤甚。手火鎗貫脅未殊。行至濟關。仰藥卒。諡忠壯。江南提督張國樑。廣東高要人。起椎埋中。按有作以降賊受撫者非也從勦兩粵土寇。洊升都司。隨向榮東征。先登陷陣。戰功冠江南。名滿天下。擢漳州鎮總兵官。咸豐六年。向榮卒。中外交章論薦。命幫辦軍務。總統諸軍。尋授湖南提督。改江南會師金陵城下。以恢復自任。十年師再潰。憤功業不竟。投丹



陽尹公橋下人馬俱沒。事聞。賜諡忠武。其事實詳見碑記。浙江提督鄧紹良。湖南人。由行伍起家。咸豐二年守長沙城。功最。從征江南。分援皖南。徽甯諸郡。晉提督。九年。灣址失守。遇害。諡忠武。直隸通永鎮總兵戴文英。廣東人。同死難。諡武烈。湖南提督周天受。四川人。由行伍從征江南。派援甯國。累著戰功。督辦軍務。咸豐十年。江浙相繼失守。甯國孤懸賊中。苦守數月。城陷。遇害。諡忠壯。湖北提督周天培。四川人。天受弟。由行伍從軍。累功至提督。駐守浦口。咸豐九年。師潰。遇害。諡武壯。直隸通永鎮總兵虎坤元。四川人。趨捷善戰。輕財募死士。有名將風。咸豐六年。鎮江下蜀街之役。以七百人走劇賊數萬。擢總兵。年甫二十四。八年。攻溧水。中礮卒。諡忠壯。總兵熊天喜。湖南人。隸和春親兵。洊保。至壽春鎮總兵官。十年閏三月。賊攻丹陽。師潰。中礮卒。諡勤勇。廣西提督張玉良。四川人。由行伍從征江南。曉暢軍事。屢獨將破賊。威名亞國樑。人以小張呼之。咸豐十年。杭州告急。率三千人馳援。至則城破已三日。鼓行先登。賊出不意。棄城走。既蘇常相繼淪沒。潰兵趨杭州。勢洶洶。幾變。巡撫王有齡令玉良

招合亡散攻嘉興不下。賊趨浙東。移師克嚴州城。進拔常山江山二縣。十一年五月。賊渠李世賢自江西東犯江常。復陷總兵李定太方統三衢軍。棄浮石渡不守。賊掠龍游破金華。窺諸暨。全浙大震。時巡撫主兵柄。有齡貪而驕。懦而復以市儉竊高位。諸忠橫被摧陷。兩浙大局全壞於一人之手。朝廷憫其死事。姑弗深求而輿論至今唾詈。至有塗牛馬矢於其專祠者。將軍瑞昌擁總統虛號。唯諾受成。玉良以客將孤寄。提殘卒不滿五千。崎嶇搘拄危苦萬狀。省中又時時齟齬之。玉良憤歎扼腕。意氣彌厲。所至挾朝衣一襲自隨。識者早知其必死。十月。杭州再被圍。由桐廬浮江下。孤軍深入。破賊壘十數。抵鳳山門。遣人請兵出紮通饒道。不應。越宿外圍合。玉良駐師江岸。猶日夜問瘼傷。勉忠義往來部署。忽飛礮集右足。折股卒。杭人至今哀之。謚忠壯。內閣中書陳克家。元和人。工詩。得山谷神髓。甲辰舉人。從軍金陵。爲張國樑掌書記。保中書舍人。十年師潰。遇害。山東直隸州判吳士諤。沅陽人。己酉科拔貢生。以本班就職。分發山東。奉檄解江南軍火。投効和春營。與陳克家同日被害。內閣中書馬釗。長洲人。甲辰舉人。習小學句股。喜談兵。先以籍紳理

劉存厚營饑。敍青浦功。保中書藍翎。十年。從總兵熊天喜爲幕客。死丹陽之難。

### 吳文節被害堵城

吳文節公文鎔之督兩湖也。粵賊方由江西回竄。田家鎮師潰。省城戒嚴。時咸豐三年九月。公受任甫三日也。巡撫崇綸懼欲逃。揚言督兵營城外。公策馬往詰。則曰饑。絀兵單。城豈能守。公正色曰。汝朝廷二品官。何出此語。此時吾輩舍城存與存。城亡與亡。八字外。豈有他策。撫臣曰。公欲死節。博美名耳。軍興疆臣多併節。吾二人頭顱。儻再落么麼手。如國體何。公忿不能遏。拔佩刀斫几上曰。誰再言出城者。汗吾刃。撫臣齒戰面土色。惕惕然驚。不復能正視。公嬰城固守數十日。竟擊退劇賊。城賴以完。撫臣則大憾。所籌畫悉反。公所爲檄饒徵兵。百計齟齬。十一月。公遵旨督兵。攻黃州。賊少有斬獲。明年正月。移駐堵城。距城五里賊縱火焚營壘。士卒驚潰。公遂被害。公雖以同舟非人。賜履淪沒。而建祠錫謚卹典崇優。彼撫臣者。旋奉嚴旨逮問。畏罪自盡。同一死也。而有泰山鴻毛之分。人亦何樂而不爲吳哉。

## 朱伯韓之識張忠武

桂林朱伯韓觀察。居諫垣。與蘇廷樾。陳慶鏞。齊聲號稱三直。又從倭文端。唐確。慎李文清諸公游。與聞道學之統。其經術考據。則與曾文正公。何子貞。張石洲諸君相切劘。其工詩古文。與梅伯言。邵位西。張端甫。吳子序。余小頗。陳藝叔。劉椒雲。馮魯川。六七君子。及其鄉人龍翰臣。王少鶴。同時各成一家。蓋道光朝魁偉振異人也。粵西賊起。方在籍辦團練。張忠武公之來歸也。官吏多疑之。觀察獨謂忠武可任事。毅然以十口保其無他。忠武卒爲名將。蓋臣論者謂李白之識郭汾陽。殆遜之矣。按收降張忠武事。諸說互歧。平定。粵匪紀。略屬之銅山制府馮氏。桂芬。李氏。元度。集屬之勞文毅公。朱後以道員游浙。浙撫王有齡。駭不知兵。假籌饗名。恣苛歛。觀察每有言。嫌其迂闊。賊既圍城。觀察守清波門。督士卒守禦甚力。食將盡。偶得米。猶分數斗。饗舉人伊樂堯。樂堯經生。觀察道義交也。城陷。罵賊死。觀察忠孝大節。炳若日星。而力保張忠武公。功績尤偉。其圍城饋粟一事。亦見平生風義云。

### 多龍鮑虎

中興名將塔羅彭楊四公。隨曾文正勦立楚軍。實開果毅堅貞之風氣。稍後則滿臣惟忠勇公多隆阿。漢臣唯子爵提督鮑公超。驍勇敢戰。與之齊名。軍中呼爲多龍鮑虎。

### 李愨肅之流芳

咸豐二年六月。武昌不守。署按察使糧道唐縣李愨肅公卿穀。隨藩司剛介公岳興阿。臬司曹公懋堅殉難。李公之死。自縊於寓館之後樓。屬官僕從數輩亦同死。賊目踞其室。每欲登樓。必有異香襲人。頃刻頭痛欲裂。遂封閉之。公子武愨公孟羣。時由廣西卽用知縣。積功至道員。聞變後。嘗膽枕戈。誓不與此賊同戴日月。自湖南勦賊至湖北。從胡文忠公克復省城。武愨先縊而入。匍匐尋父屍。至寓樓。見髑髏白骨。縱橫布樓上。獨愨肅屍。面色如生。豪髮無損。泣血殯之。居民述其靈異如此。文忠以入告焉。後武愨著皖撫。殉廬州之難。營破猶持矛屹立圍牆。厲聲高罵。手刃悍賊數名。

力竭死。一門大節。青史長留。祠廟巍峩。楚皖士民。椎牛雪涕。以祭者不絕焉。

### 好官殉難

軍興以州縣殉節者不可枚數。而上元縣劉公同纓。烈聲最著。公初權吳縣。善捕盜。移治上元。兩年。尤得士民心。咸豐二年。聞武昌警。嘗上防江策於總督。不能用。自九江師潰。總督喪氣歸。布政祁公憂憤疾篤。公羅掘得五千金。穀二千石。爲民倡儲粟。運石修火械。召義民登陴力捍。三年正月。至二月。守十餘晝夜。不稍懈。地雷陷城。突入賊數百人。公揮衆戮之。城復完。賊緣梯而上。如蟻集。衆寡遠不敵。守者驚散。公還署。殺二妾。朝服坐堂皇。賊望見顏色。凜然。皆嘆曰。若好官。吾儕勿相害也。公大罵。躍入署後潭中。以死。後潭旁。每夜見神鎧旗旒。賊甚怖之。相傳公智深勇沈。志節遠大。罵賊而賊不忍害。賊且知公好官矣。而奈何防江策之不見用也。

### 馬生角

粵逆石達開之擾四川也。朝命兩湖總督駱文忠公督師援勦。穆宗登極。調公督四

川公方攜湘中兵隨征。而以記名道黃忠壯公醇熙。記名按察使蕭壯果公啟江。分統之。二公先後陣亡。公率所部卒。以同治元年四月禽石逆於紫打。蜀亂始平。先是蜀中謠云。四川地土薄。硝磺用不著。若要太平時。除非馬生角。蕭俗書作肖。蕭黃同。勦石逆。猶加二字於石旁也。治賊無效。故曰用不著。角各音近。馬生角。馬旁各字。指公姓也。然則前史所紀諸謠讖。非盡秉筆者之好採異說矣。

### 勞崇光之饋砲

洪軍圍桂林。先後三年餘。時撫桂者爲長沙勞文毅公崇光。城中守禦者。惟撫署親兵三百餘人。武巡捕某弁統之。又民團五百餘人。紳士張某統之。城外駐湖南援軍千餘。洪軍圍城雖久。實未嘗進攻。蓋其精銳悉北趨。此間僅留老弱者。以爲牽制耳。城中屛三門。惟開西門。以通出入。土人初猶畏懼。日久漸相忘。民或過其壘。亦不查問。壘中或缺食物。入城購買。披髮紅巾。游行街市。不以爲怪。官軍將校。多與往來。通欵曲。團結張紳。酬酢尤密。令節朔望。常置酒招官紳飲。諸官紳坦然赴之。亦時時於

城外置酒奉答。惟不敢公然延客人城耳。桂城被圍久。餉源斷絕。主客軍不滿二千人。欠餉皆積年未發。軍士知不可得。亦相與安之。文毅一日怒某弁。詬之甚厲。弁不能堪。怏怏出。語軍士曰。當此時。世猶向我輩使上官身分耶。吾將辭差去。不能鬱鬱久居此矣。衆曰。君去固不敢留。但所欠我輩餉如何。弁曰。我已失歡於大帥。安能再索欠餉。汝等自向大帥理論可耳。於是衆人據撫署大堂。各訴飢苦。俄而聚愈多。噪漸厲。勞在內聞之。自出彈壓。甫及門。鋒矛已自門外入矣。卽悚然退歸。召某弁至。譙讓之。使以大義安慰衆心。弁辭不往。勞大怒。坐以激變軍心。而下諸臨桂獄。另簡一人爲親軍長。一面令司道府縣安撫變兵。許以餉至卽發。諸軍本無意爲難。聊抒憤懣而已。遂亦散去。如是又數月。某弁在獄。意忽忽不自聊。一日上書文毅。自言從公多年。一無建樹。中路蹉跌。實所不甘。與其羈死囹圄。毋甯戰死沙場。倘蒙恩釋。出當率所部殺賊。致果以報。文毅得書。笑曰。某特欲出耳。然果能出戰。亦大佳事。卽召之出。獎其勇敢。謂曰。汝所部僅三百人。安能與戰。弁曰。尙有張紳所統團練五百人。可



令彼爲後勁。某當死力効前驅。文毅首肯。卽以令箭召張至。語以故。張大驚。念今日乃言戰耶。惟不敢違撫令。姑許諾。相率出城。壓壘而陣。鳴鼓大譟。洪軍出視。亦大驚。迎謂曰。彼此無猜。相安久矣。今何忍出此面目耶。弁不答。麾衆直前。洪軍始知其來眞戰。遂蜂擁拒敵。不食頃。某弁與三百人。已皆併命矣。張紳繼至。頓足曰。吁。敗矣。彼已全軍覆沒。我何面目復命。痴立良久。卽馳赴敵壘。令從者以被虜回報。團勇者皆城中無賴子。惟張能馭之。張旣去。軍爲統率。輒爲暴閭市。官吏不敢詰。命他紳接統。皆辭不能。文毅無如何。思謀贖張紳歸。乃遣使去。詣敵壘商之。敵允贖。惟要以大砲四尊。紅縐十疋。爲交易之媒介。使者返命。文毅難之。曰。紅縐無足重輕。大砲胡可昇敵。外人聞之。其將笑我爲何如人耶。復命使者往。議以數百金。爲大砲之代價。敵不允。必欲得砲而可。往返數次。諸官相顧無策。藩司某進曰。今大砲旣無用處。在此與在彼一也。惟勿令士民知之耳。請先聲言。允給紅縐。不允給砲。而暗以縐裹砲身。使人但見爲縐。不知爲砲。昇諸城外。俾彼自取之。不亦可乎。文毅乃戰然曰。君眞能辨。

大事者也。如其計行之。而張紳得歸。

### 崔提督之使酒復諫

崔名大同。咸豐初。廣東記名提督。會洪楊難發。粵中土匪四應。省會戒嚴。制府檄崔督師東門外。時崔方篆某鎮。奉檄返省。制府授以方略。畀以軍械。乃辭出東城。崔性疎狂。尤豪於飲。日必吸汾酒數斤。醉則據座大罵曰。跳梁小醜。乃足擾吾酒興耶。將校稟事。偶不慎。輒遭笞責。其軍令然也。既辭制府出。乃告將校。詰朝首途。命弁勇束軍械。先舁出東郭。一將校曰。賊氛甚惡。恐將要截。宜使弁勇執械。以備不虞。不宜捆載以往也。崔大怒曰。若輩何知。乃敢亂我軍令。賊果要截。我當奮臂捉之。若輩多備鐵索。佇看縛賊可矣。將校太息而退。翌晨。使軍官押械先行。崔則扶醉乘馬。十餘親兵隨其後。既出東門。崔忽仰天大笑。顧謂從者曰。大好江山。殊足供我憑眺。顧安得有賊乎。復前行。未及一里。忽有數田夫。手持鋤鍤。直趨馬前。疾聲曰。賊在前途。要截提督。其鋒甚銳。不可當也。請速回。崔大駭。亟勒馬返。而數田夫。忽要其前。舉鋤鍤刀。

擊之。崔不及備。親兵以無軍械。皆潰散。崔遂遇害死。時罵賊猶不絕也。賊去。親兵乃徐集。負崔尸而返。各官大驚。馳往驗之。鱗傷百餘處。腦漿迸裂。血涔涔透重衣。死狀慘極。顧以其使酒。懷諫。咎實自取。又未及抵營。視軍不能援死於王事之例。以議卹。故僅由家族備殮而已。

### 林剛愨公是好男兒

漳州瑞香亭之役。林剛愨公文察兵敗被執。不屈而死。漳之父老相傳。多謂侍逆李世賢在浙東時。數窘於公。脚之次骨。特以鼎鑊烹之。非也。當公之以全閩陸提領兵平賊也。侍逆震其威名。集衆籌對付之策。僉議須以計取。不可力敵。後公果以假降被給見執。時同繫凡五人。都面無人色。獨公神色鎮定如平時。侍逆屢溫言勸其降順。且誘予以重權。公怒叱之。謂我乃堂堂大將。豈屑降小賊子。舉足踢之者再。侍逆於是知公之志不可奪。遂遇害。傳首至。侍逆拱手揖之。且嘆息爲好男兒者累日。此事有南靖張茂才鳳藻。在侍逆幕中所親見。張以秋試自省會歸。行次郡城。爲賊獲。

以善醫禮遇之。尋以計脫歸。屢爲人言此事甚悉。張君又言侍逆年四十餘。素不近女色。一日有部曲擄一絕色美女獻之。侍逆曰。我輩從事疆場。惡可以尤物自累。立資遣之。而戒獻者以後勿復爾。噫。盜賊如此。亦足多矣。

### 朱洪章爲破金陵之首功

曾忠襄之克秣陵也。大將李臣典。蕭孚泗。咸膺上賞。錫封子男。而不知悉黔將朱洪章一人之功。李蕭皆噲伍耳。洪章黔之鎮遠人。胡文忠爲鎮遠守。洪章以親軍隸麾下。文忠壯之。及陳臬湖北。遂挈以自隨。肅清武漢。實爲首功。文忠太夫人壽。洪章使酒罵座。忤其曹偶。文忠慮不爲諸將所容。因遣從曾文正軍。文正使帥精銳數千人。隨忠襄搏金陵。忠襄部下皆湘將。洪章以黔人孤立其間。每有危險。輒以身當其衝。以此知名。忠襄益倚重之。初開地道於龍脖子。垂成而陷。健兒四百殲焉。皆洪章部下也。兩次地道成。忠襄集諸將問孰爲先入者。衆皆默然。洪章憤願一人爲前驅。從烟燄中躍上缺口。以矛援所部。肉薄蟻附而登。諸將從之入城。遂復。臣典於次日病

卒。忠襄好語慰洪章。使以首功讓臣典而已。次之。洪章慨然應諾。及捷報至安慶。文正主稿入奏。乃移其次第。以洪章爲第四人。於是李蕭皆封子男。而洪章乃僅得輕車都尉。殊不平。謁忠襄語及之。忠襄笑而授以佩刀曰。捷奏由吾兄主政。實幕客李鴻裔高下其手耳。公可手刃之。洪章一笑而罷。其後終雲南鶴麗鎮總兵。張文襄督兩江時。洪章猶在。然閑廢久矣。文襄爲奏起之。使募十營。駐守蘇浙間之金山衛。軍紀肅然。市廛不擾。未幾以積勞觸發。舊創卒於軍。吳人至今猶盛稱其惠云。

### 張晉祥言利之奏

給事中張祥晉上奏云。粵西軍興以來。不過兩載。所費不下三千餘萬。請急籌經費以濟時需。一擬抽收內地鶯粟花稅。比照茶酒等物。一律從重徵取。一擬將內務府宮內舊存金器。改鑄金錢。與紋銀一律通行。一擬將京城現收舖租章程推廣於各行省。一律辦理云云。上命交部議覆。部議駁不准。

### 幕僚爲中興將相

中興人物。多由辟幕起家。其最著者。如合肥二李之客曾文正。左劉二公之客駱文忠。尤爲表表。祁文端公寓藻。縵猷亭集。載文敏節相百齡督兩江。林文忠及陳芝楣中丞。變均爲幕僚。文敏均許以封疆之才。後果不謬。陳中丞佐文敏時。居署西偏池。上百八十竿精舍。嘗作小篆。榜於亭曰。個中樂。及陳權兩江督篆。復居此亭。舊同幕友顧蕙。爲作個中真意圖。僚屬多有題詠。

### 天青緞

段廉訪初官浙中知縣。累擢按察使。勤於爲治。深得民心。陳臬時微行酒樓茶肆間。緝訪奸宄。遠近稱神。民赴州縣訟者。或累數十日不得一決。廉訪得狀。卽鞠問。判訖釋去。案無留牘。百姓感之。稱曰。段青天。及杭州初陷。倉猝出城。將軍留之。不可。曰。同困城中無益。不如出而圖之。猶可爲恢復計也。百姓不知其意。遽改其稱爲天青緞。以謔之。

### 鐵鎖

蕪黃以東。有半壁山焉。孤峰突峙。俯瞰大江。一夫當之。百人沮愕。賊於山下。置橫江鐵鎖四道。北達田家鎮。護以木牌。夾江築堅壘以守。羅公澤南率諸軍攻之。賊酋坐將臺督戰。龍旂黃蓋。勢張甚。公戒士卒勿輕進。待賊銳既竭。突起急攻。賊多觸石崖墜死。水師乘勝。以洪爐大斧。鎔鑿鐵鎖。燔賊舟以千計。火光夜照數十里。賊潰田鎮平。

### 蛇山

粵賊三陷武昌。副將王國才。自九江率隊來援。夜半抵省。不知城之已失也。呼於望山之門。賊啟門納之。亦不知爲官兵。真至蛇山前。彼此問訊。始悟。殺聲大起。國才慮孤軍深入。寡不敵衆。且戰且退。退至城外結營焉。

### 雷再生

枕亞言。靈隱有僧老矣。貌奇而古。鬚白如銀。蓬蓬若結雲氣。見客不甚爲禮。與言禪理。頗奧妙。問其名曰再生。問命名何義。則笑不答。再問之。暝矣。

再生雷姓。夏名豫。產也。富甲一郡。其父震。仗義疎財。鋤強扶弱。以任俠名於時。母陳氏。慈善家也。能相其夫。廣周貧乏。時人稱彼夫婦。一爲金剛面目。一具菩薩心腸。佛弟子而衆父母也。年四十餘。猶抱伯道之戚。禱於某寺。彌勒像生。夏種善因而得善果。天道固無訛也。

夏生五歲。父攫劇疾。將死。囑其妻曰。余乃不及見此子成人。有楹書在。卿善教之。第勿求仕進。以蹈不測。若能奉母隱居。斯爲最善。不出十年。世將大變。一入宦途。則若敖之鬼餒矣。父死。母如其命。延明師課夏讀。夏慧甚。七歲畢五經。未幾。母死。彌留時。重申亡父遺命。夏涕泣受教。又三年。學大進。師固科名中人。慫恿應試。夏亦自負。頓忘父訓。一戰而霸童軍。煙霄得路。穩着祖鞭。南宮再捷。出宰溧陽。

宦興初濃。驚魂旋斷。夏蒞任甫五月。適太平軍起。乃決棄官。星夜馳歸。又以故鄉非樂土。貶價盡售其產。子身挾巨資南下。夏之來吳。依其戚也。戚包姓。時方爲某縣令。夏至。歡迎甚。館之外舍。虎口餘生。幸逢賢主。夏固深自慶。幸包更曲盡殷勤。流離顛



沛之餘。客情快慰。

包小人也。工於夤緣。而嗜財如命。夏雖與有戚誼。已疎遠不相聯屬。平日不相聞問。今事急相投。乃深蒙覆庇。金錢之力耳。夏旣德包。亦欲稍圖報効。以五百金爲包壽。包力却之。侃侃數言。激昂慷慨。夏益感涕。且謝過曰。吾以小人之心。度君子之腹矣。雖然。施而不報。事胡可久。行將別君而他往耳。包曰。遍地烽烟。行將安適。吾意君且住爲佳也。嗚呼。夷齊其口。盜跖其心。包所計者。欲借端傾陷。死夏而盡攫其貲。而夏固懵然罔覺也。時戰禍方亟。羣盜乘之蠶起。會民家有被刦者。盜殺僕婦二人。傷一人。遺刀於地。席捲所有而去。次日報驗。包見刀柄刊有四字。曰雷氏家傳。忽心動。問傷者以刦時情狀。傷者言盜共十餘人。執刀者二。一殺人。一爲之助。餘皆手持木棍。搜括財物。後乃呼嘯俱去。包亟下令捕盜。獲其一。鞫之則殺人者。而助者不得。下盜於獄。豐其飲食。陰遣人唆盜。誣指夏爲同夥。并許以不死。盜如其言。包乃逮夏。夏大駭。問何故被拘。包語之故。令與盜對質。盜直言汝乃不識我耶。汝爲雷某。與我同刦。

某家汝忘之乎。夏大譁辨。而盜喙如鉤。堅啄不釋。且兇器具在。柄字鑿鑿。更無夏伸喙地。包勸其實供。當爲設法輕減。夏極口呼冤。包大聲曰。雷某此爲何地。鐵證如山。汝猶狡賴耶。我不忍見汝穀棘。雖然。今日之事。君事也。我不敢廢。嚴刑逼之。夏不能堪。遂誣服。至此始悟包陷己。則大怒詈包無言。但指揮羣役曳之出。

獄上大吏不省。盜以正兇論大辟。夏以從擬絞。同日刑於市。蓋盜亦爲包賣矣。時亂後乏刑者。每決囚以營兵代。兵未諳絞法。行刑之際。大雨適至。倉卒畢事。夏氣不絕如縷。夜半復蘇。見死屍在旁。驀憶前事。知己未死。力脫其縛。匍匐前行。約里許。路黑如墨。四無行人。惟聞前巷犬聲撲撲。戰栗不敢前。正趨趨間。瞥見一黑影迎面來。夏急隱避路旁。來者似已覺。卽止不前。撮口作異聲。夏大懼。從昏暗中。審視其人。短衣窄袖。背負一巨裘。悟其爲夜遊將軍也。自顧身衣囚服。襤褸之狀。適與相類。乃亦撮口作聲以應之。其人卽招與同行。問從何來。得利也未。夏僞曰。我運大惡。連夕鑽營。乃無所獲。不如子也。且子何名乎。其人曰。我鄧七也。夏曰。聞名久矣。且談且行。抵一

茅舍相將俱入。蓋鄧家也。鄧留夏宿。夏固無所之。卽亦不辭。因相與藉藁臥。

明日失絞犯屍。兵懼獲譴。不敢聲。以埋復命。夏匿身圭竇。惴惴焉恐邏者之至。繼知無事。則轉念此讐必報。知鄧七前行竊被擒。捉將官裏去。備受酷刑。幾斃杖下。亦恨包刺骨。因利用之。欲與鄧同窺縣署。鄧果諾之。夏更向鄧假一匕首。頗銳利。藏之於懷。魚更三躍。兩人從署後穴壁入。鄧注意黃白。已入他室。搜檢。夏徘徊於庭堦之下。忽見上房燈火熒熒。似有人語。躡足就窗隙窺之。則包方與其妾喃喃情語。未睡。不覺嗒然。逡巡間忽得一計。卽散其髮。赤其足。出懷中匕首。擊於掌。悲嘯一聲。飄忽而入。包驚起。大呼冤鬼。夏已至前。舉首直貫其胸。砉然倒矣。其妾欲逃。并殺之。急棄刀遁。纔出穴。署中人已聞聲麇集。知鄧必無幸。歎曰。吾乃亦賣是兒耶。雖然。急迫之際。寧復能相顧者。屏息前奔。天明已出縣境。

夏雖出險。而囊金不返。襦被無存。於是歷盡苦辛。由吳而浙而楚而秦。足跡遍大江南北。

旋復崎嶇入蜀。至成都市。變姓名曰夏雨田。蓋以名作姓。而兩分其姓爲名。見江湖論字者。日獲數百青蚨。夏書法固精。間作一二長聯。入市求售。筆飛墨舞。見者嘖嘖歎賞。以其取潤至廉。爭相購致。以是硯田收入頗不惡。

一日有富商某過市。見夏書奇之。曰此名人筆墨。非江湖下技也。就與語。大悅。更詰身世。夏約略語之。商爲扼腕。謂之曰。余正欲覓一善書者爲掌簿記。兼司出納。君能從我歸。當以一席地相假也。夏聞言大喜。收拾偕行。

夏素工心計。既入商家。從事持籠握算。較錙量銖。商倚爲左右臂。且夏誠樸忠謹。儉約無所欲。涓滴歸公。從未一染指。如是數年。鮮有過失。商嘉其勤慎。分以餘財。使營什一。蜀產固饒。貨殖之益。無不利市三倍。夏以所得者權之。三年而獲萬金。卽以蜀爲根據地。分途出發。南通滇粵。北達雍涼。旁及京師齊魯。皆貨販往還。無投不利。數十年中。積金百餘萬。娶妻納妾。生子三。長承父業。次登仕版。幼則侍父家居讀書。時豫境久平。而夏年亦老。浩然有歸志。摒擋數日。挈眷而東。夏以是痛定思痛。燕居深

念兀自寡歡。

一日。夏謂其子曰。我自逃刑離吳。迄今五十寒暑。偷生已匪伊朝夕矣。不知吳中父老。有能談往事者否。我欲一游吳市。爲再來之人。祿可隨行。子諫不聽。遂買舟南下。入吳後。游行於市。城郭如故。人民已非。詢包令被刺事。已無有能道其詳者。偶經司獄監門。指而謂子曰。某年月日。我含冤入此中也。及臨通衢。又指謂子曰。某日某時。我就刑縛而過此地也。淚爲暗下。再至一廣場。指左側曰。此停我囚車。牽身出戮處也。復前十餘步。曰。至矣。指一塊土。可丈餘。慘白不生寸艸。泣曰。此我受刑橫屍之地也。言訖。嗚咽不復成聲。子勸且慰。并戒勿屬人目。夏猶徘徊自弔。不忍遽去。旣歸舟。掩泣良久。忽大笑曰。奇哉。我以區區一身。而官而盜。而囚而賊。而乞丐。而傭書。復由傭而商。而巨富。而封翁。生而死。死而生。富而貧。貧而富。前後過渡。輾轉如環。變幻乃至不可思議。凡此者皆魔耳。今群魔已盡。萬緣皆空。煩惱場中。不容駐矣。於是願爲緇流。命其子返棹回里。且語之曰。爾歸寄語家人。各自愛。我不返矣。其子苦諫不

從。乃涕泣而去。夏初名再來。後更再生。其由天甯而金山。由金山而靈隱。意在避其家人之物色。時其次子方游宦吳中。求其父不得。聞靈隱多名僧。姑往一問訊。至則再生已於先日去。殆已能前知矣。其子大失望。歎息爲衆僧述其事如此。枕亞述。

### 王壯武張宴九嶷山

咸豐五年春。王壯武。由楚邊追敵於粵境。假道寧遠。張老人者。年一百十八歲。縣中不知有老人。饑寒鮮調恤者。公入其縣。卽遣人存問。爲置田宅資其子。使娶婦。且召飲之。比公破敵還。復途過省。老人。老人。即已抱孫矣。乃邀之登九嶷山。合賓客部曲。張宴山上。是日爲公封翁。生朝。客以次奉觴。遙爲壽。且慶公功。酒酣。公起望山東故里。不覺悵然曰。蓋常有三恨。恨任事太早。學業太淺。用心太苦。而多忤人。身遭時變。以士卒用力。人號爲勁軍。吾常恐世亂未已。將無以畢三恨。奉養二親。爲將奈何。老人起執爵。慰以大義。合席舉酒極歡。公班師回楚。卽乞假幕府。省親。於是離家已四載矣。迹公九嶷張宴一會。覺驅車九折阪。置酒三垂岡。叔子游峴首。梁公陟太行。

前史風徽猶可頡頏也。

### 鄧亞魯之勇武

鄧亞魯者。粵西武宣人也。有殊力。家貧。常爲人傭。食量兼人。所得傭資。每苦不給。咸豐元年二月。洪軍由桂平趨武宣。攻據東嶺村。城中戒嚴。當時守兵不滿千人。遂招募壯丁。以厚城守。亞魯時在城中。往應募。乃因襤褸如乞丐。被斥逐。時有候補知府張敬脩。管帶東勇二百名來援。駐師北城外之關帝廟。亦以兵力單薄。就地添募。亞魯復往應募。門者叱之曰。今者添募勇士。非丐食之所。盍速去。亞魯乃自炫其勇力。央懇再四。自辰至於日昃。終不得通。憤甚。覷門首有石獅二。遂手各一獅。奮擲數十步之遠。揚長而逝。斯時也。適有戎幕某自內出。見其狀。大異之。立飭門者追之。使同導入內。見張守。張守奇其狀貌。并知其有勇力。擢爲隊長。時署粵西巡撫周天爵。親督師援武宣。洪軍乘夜抄襲。閩勇管帶吳貽書陣亡。都司譚紹良。鄭魁士。皆受重傷。周署撫被圍不得脫。張守聞警。遂會合城守之兵。同往救援。亞魯以銅錢結成之半。

臂披於身上。左執長矛。右握朴刀。率死士四人。大呼陷陣。往來衝突。電閃颯馳。斬獲不少。時洪軍主將韋大孫。立馬陣中。指麾鏖戰。亞魯顧其從卒曰。擒賊須擒王。今日正我輩立功時也。遂馳入陣中。韋見亞魯等僅四五人。殊不在意。既近。遂以大刀砍亞魯。適中銅錢所結之半臂。鏗然有聲。而亞魯之長矛。已刺入韋之胸部。矛鋒自背後透出。復用刀向上一擲。韋之屍身。挑起丈餘。洪軍見之。皆大駭。狂呼散走。東軍及城守之軍。俱乘勢奮進。周撫之軍。亦自內突出。洪軍大潰。委棄輜重。及擄獲之婦女。無算。兵士正在追逐之時。一見婦女。遂欲大肆淫污。亞魯見之。大不忍。馳白張守。索取周撫令箭。馳往禁止。諸婦女始得免污辱。周撫見亞魯之勇敢。欲羅而致之麾下。辭曰。亞魯一武宣之長傭耳。不遇張公。何以有今日。亞魯受張公知遇之恩。不願捨去。周撫曰。我嘉汝勇敢。欲令汝獨當一面耳。亞魯曰。果蒙大帥栽培。惟須仍隸張公屬下。始可應命。周撫嘆曰。真義士也。乃奏署綏寧營把總。改名鄧貴。夏四月。洪軍自武宣東鄉。入象州之中坪。據之。張守奉檄命援。亞魯率兵士百人。乘夜突入中坪。焚



其營壘。復大呼奮斫。洪軍驚潰。遂大勝之。張守以功陞署右江道。亞魯亦實授綏寧把總。八月。洪軍攻入永安州。知州及副將皆死之。張道會同貴州鎮秦定三。都統烏蘭泰。圍攻永安。相持頗久。二年二月十六日。永安之洪軍。乘夜焚燒解署民房。啟城突出。城外之圍軍大潰。張道屢瀕於危。亞魯以身翼蔽之。始得脫。而亞魯以頭額受槍彈傷。遂殞焉。時年二十有三歲。

### 胡林翼之遠慮

有合肥人劉姓。嘗在胡文忠公麾下爲戈什哈。旣而退居鄉里。嘗言楚軍之圍安慶也。文忠曾往視師。策馬登龍山。瞻眇形勢。喜曰。此處俯視安慶。如在釜底。賊雖強。不足平也。旣復馳至江濱。忽見二洋船鼓輪西上。迅如奔馬。疾如飄風。文忠變色不語。勒馬回營。中途嘔血。幾至墜馬。文忠前已得疾。自是益篤。不數月。薨於軍中。蓋粵賊之必滅。文忠已有成算。及見洋人之勢方熾。則膏肓之症。著手爲難。雖欲不憂而不可得矣。閩丹初尙書在文忠幕府。每與文忠論及洋務。文忠輒搖手閉目。神色不怡。

者久之曰。此非吾輩所能知也。噫。世變無窮。外患方棘。惟其慮之者深。故其視之益難。而不敢以輕心掉之。此文忠之所以爲文忠也。

### 溫紹原守六合記

溫紹原字伯平。湖北江夏人。少負異才。性孝友。咸豐元年。權知六合縣事。下車脩城垣。屯義穀。期年集事。二年冬。粵兵初犯武昌。公曰。六合雖小邑。然濱江屏蔽淮泗。賊乘風而下。日可千里。此要地不可玩也。於是招募壯勇。製器械以備不虞。三年春。粵兵據江寧。陷揚州。果以千人犯六合。又分隊竄擾鳳泗間。邑城四面受敵。公率衆與戰。敵少卻。繼以大隊夜至。或議閉城拒守。公曰。不出戰不能守城。預戒兵勇。不及賊母。發火器。夜行宜靜。毋譁。遂出縱馬前行。衆請所之。公曰。惟予馬足。是從。賊初由長江鼓行東下。屢陷名城。大帥遇之輒潰走。勢燄方張。旣至。見城小。內外寂然。心易之。公忽由間道繞出賊後。銃礮競發。以暗擊明。敵衆驚潰。清兵奮前追殺。無不鼓舞爭先。一以當十。敵自相衝擊。死者無算。四年。粵兵冒難民謀入城爲內應。公偵知。稽核

市塵。凡城內士民。皆給符驗而出入。外至者問所投舍。守城兵引往質對。以故奸宄無所容。敵掘地道。公自內掘出。先發擊之。城圯。隨時堵塞。先後十數戰。賊屢挫衄。積功擢江寧府。加道銜。縣事委於李君守城。公獨任防勦。時紳士信公既深。倚公爲柱石。居民客商。及遠近避難入城者。皆助守。不願遷徙。誓與城爲存亡。六年。江北大帥德興阿。以蜚語入奏。褫公職。敵釃酒相賀。七年。何制軍疏復原官。加運使銜。任事如故。一不以升黜爲念。八年八月。敵由廬州大舉東竄。城中兵祇二千餘。請於制軍。益兵數千。而德帥調赴浦口。甫至而大營潰。粵軍裹脅兵勇。直趨六合南關。公與宣化鎮軍羅玉斌等。晝出擊殺。夜入巡城。婦孺皆運磚石以助。歷二十餘日。都司王家幹力竭陣亡。糧盡援絕。公集紳士張位中等。曰。諸公爲紹原力。已至矣。我死無憾。何以對闔境生靈。語未畢。邏者報東城且破。公趨東城。而敵從西北隅入。格鬪良久。身受數創。既仆。猶奮臂握拳。唾罵不絕。至胸腹破折。項頸斷裂而歿。夫人王氏投水死。子輔才同時遇害。城中百姓以萬計。僅見宣化軍踰城東逸。餘者殲焉。先是公母就養。

署中公使弟奉母出。而留王與輔材不遣。曰：不令吾民婦子獨死也。又陳桂伯云：賊之初犯六合也。孫寅三等率衆八千攻城。公令士卒飽食出戰。而預遷城南民於城內。空室中廣積薪草。灌油其中。竈底皆布火藥。旣戰。歷數時。佯敗入城。追兵至城南。餒甚。各就民舍炊飯。竈突火起。遠近同發。公急開城。截其去路。四面伏兵兜勦。饑疲不能拒敵。殺死溺斃者過半。自武昌以下。未有如此受創者。

### 江南大營之二次失陷

王雪軒方伯之擢任浙撫也。藩庫實存銀一百餘萬兩。代公者愛惜小費。探船偵騎。皆汰滅。時金陵大營積欠軍餉甚鉅。和帥慮補給無期。議每歲祇發八月。遇閏減半。軍士大譁。閏三月己酉。敵集諸路死黨圍攻和營。前後同時火起。遺金及礮位兵械。率齎寇。總統張公拒戰十晝夜。力不支。遂退丹陽。飛書調餉六十萬。冀以收拾人心。再圖進取。司財者祇發六萬。衆志益攜。賊僞爲官軍裝束。數道並進。公冒雨出城。護築營壘。墜馬傷脇。而前敵提督王浚總兵熊天喜力竭陣亡。公率小隊百餘人禦擊。

良久。及橋。百姓爭涉者。擁塞橋口。公勒馬衛之。俟其去。躍入河死。和帥去之。常州無人。又去之。濟墅關乃卒。

### 張國樑逸事

張國樑。謀勇兼優。戰無不勝。保障蘇浙郡縣垂七八年。吳越之人。至今尸祝。其後以兵餉大權。爲共事者所掣肘。功敗垂成。卒以身殉。其年少時逸事。有人所未盡知者。茲特采輯一二。以著英雄之氣概焉。公初名嘉祥。廣東高要縣人。美秀而文。恂恂如儒者。然喜任俠。跡弛不羈。年十五之粵西。從其叔父學。賈顧心弗喜也。日與輕俠惡少年游。其黨有爲土豪所困者。公往助之。殺人犯法。官捕之急。遂投某山盜藪。盜魁奇其貌。以女妻之。女嫌其疏賤。不可。盜魁欲拔爲己副。其黨又不可。山中例呼魁爲老大。其支黨皆爲兄弟。稱自二三四五以下。各以才能之大小。爲次之先後。乃呼嘉祥爲老么。么者第十也。然每出劫。必倍獲。抗官軍。必告捷。羣黨皆驚服。一日山中糧匱。因往劫越南邊境。名爲借糧。越南人驅象陣來禦。盜馬皆奔。嘉祥使其黨捕鼠數

百。明日復戰。擲鼠於地。縱橫跳踉。象見之皆懼。伏不敢動。遂獲全勝。大掠而歸。頃之盜魁病死。羣黨推嘉祥爲盜魁。嘉祥有衆萬人。以兵法部勒之。與之約曰。凡劫官商。毋得殺人。財貨必留還十之一。俾得爲商之貲本。官民之旅費。旣而官軍討之。山中倉猝無兵器。嘉祥使人揭一竹竿。以禦兵器。戰益久。則愈削愈銳。以刺人。無不死。且傷者。又獲大捷。然兵吏爲所執者。皆禮而遣之。且具書自陳。不得已爲盜狀。苟蒙赦宥。願盡死力。及洪秀全反於金田。遣黨招之。嘉祥拒不往。曰。吾之爲盜。非得已也。豈從叛賊者哉。向忠武公榮提軍廣西。使紳士朱琦爲書招之。嘉祥約官軍壓其巢。出禦而僞敗。乃悉招山中財物。散遣其黨。使歸爲良。而自降於布政使勞崇光軍前。改名國樑。得旨賞千總銜。歸向公差道。由此戰必爲士卒先。威名聞天下。蓋公年十八而作盜魁。二十八而折節從軍。爲國虎臣。三十八而致命遂志。生平大小數十百戰。善以寡擊衆。每出己意。坐作進止。率與古兵法暗合云。

### 張玉良之顛躓

與國樑同統江南大營。而戰功與之齊名者。厥惟張軍門玉良。張玉良者。四川人。由行伍從向忠武公自廣西轉戰至金陵。積官至廣西提督。賞穿黃馬褂。短小精悍。驍勇善戰。威名甚著。咸豐庚申。杭城被圍。軍門奉檄來援。至則杭城已失。軍門以三十騎乘城而上。既登。則周麾而呼曰。大軍至矣。賊狼狽奔逃。不費一矢。杭城遂復。於是聲望大振。浙省倚之。有若長城。未幾金陵大營告急。檄之回救。杭人留之。幾於攀轅臥轍。將軍瑞公學政張公挽留之切。竟至跪求。而軍門以令嚴不敢少止。遂率師去。乃到中途。大營已破。常州蘇州均不能守。仍返於杭。所存親軍僅數百人。巡撫王壯愨公招集潰散。悉軍實以予之。俾進規嘉興。以固浙江門戶。乃連戰失利。軍械遺棄殆盡。而所將之卒。均是敗兵。逃勇銳氣盡墮。已不能軍。不得已復歸於杭。杭人已自輕之。兼所部不能斂戢。時有騷擾。杭人恨之。詈之。至斥之爲通賊。巡撫亦不加以禮遇。任其飄搖江渚。庚癸頻呼。無人過問。較之前日跪留之歎。密崇重。若天壤矣。未幾嚴州被陷。巡撫檄令往援。軍門率所部五千餘人。至蘭溪。之大洋鎮扼守。蒐卒簡陣。

力圖攻取。時陳子壯太守奉檄佐松百川太守辦理軍米糧臺。因時與軍門相見。談次每以兵勇不能用命爲恨。陳曰何不重賞罰以激厲之。軍門曰此等屢敗之卒一言及賊卽心膽墮地。非獎勵所能振作。因頓足痛恨。何制軍棄常州不肯守。不然同死於彼。豈不光明磊落云云。又云杭人謂我通賊。我以一走卒蒙拔擢。官至一品。花翎黃馬褂。皆邀異數。就令降賊。安能如此。此時亦不必辨。正當一死報國。明吾心耳。然其勇大率驕悍。擄掠不可制。營官亦無如之何。商民怨之切齒。嗣後援金華復敗。走攻嚴州克而守之。旋又爲賊破。威名沮喪益甚。久之杭州被圍。奉檄回救。駐師江干。餉援俱絕。人無固心。軍門志氣銳厲。每日出隊擊賊。出必珊瑚冠黃馬褂。以自表異。時陳子壯避居富陽。會掉小舟往見之。以高敖曹旗蓋爲戒。軍門慨然曰。力竭勢窮。杭城必失。我軍必潰。與其草間求活。孰若先死於行陣之得所哉。會報賊出隊。卽麾衆持矛而去。陳知其志在必死。太息而歸。越數日果爲賊礮攢擊。折其左股。昇至營。以軍事屬總兵況文榜而暝。況統其軍。逾月城破。軍潰。況間行至上海。投李鴻章。



軍。鴻章用之擊賊有功。竟以功名終。聞軍門歿後三四日。中夜士卒忽聞號令出隊。殺賊一軍驚起。開營欲出。忽悟其死。皆大驚痛哭。同時將帥援浙有名者。曰江長貴。李定太。周天受。皆不能成功。後江李著績他省。周則戰死寧國。

### 杭州之陷

咸豐十年二月。金陵賊初陷杭州。先是張總統國樑威名遠著。賊畏而忌之。議由廣德進犯杭州。分清兵力。浙撫盡以軍事委諸運使某公。某所募勇多與賊習。或於城上相問訊。卜士王道平者。賊謀也。獲而詰之。則賊衆冒入。隸名鄉勇者數百人。當事慮激變不敢窮治。僅斬道平以徇。賊舉西湖殯棺積城下。累級而登。無以一矢加遺者。甫入六七十人。鄉勇遽帕首呼譟。滿城鼎沸。遂陷。將軍瑞昌公聞變欲自裁。左右曰。公死。吾輩無瞧類矣。不如固守。駐防城。以待外援。若援絕力盡。死未晚也。會總統飛檄張提軍玉良救杭。道過蘇州。蘇藩王雪軒方伯曰。江浙猶唇齒也。杭州不復。蘇州必危。君能於旬日內克復杭城。必以十萬犒軍。軍士聞之。奮迅疾馳。勇氣百倍。瑞公

拒守三晝夜。而提軍至。約期並舉。令先鋒僞爲賊裝入城。展旗大呼。賊見張家軍。驚爲總統。炊飯未熟而奔。瑞公縱兵合擊之。獲賊輜重無算。方伯得報大喜。犒之如其言。當時有七賊破城。三十人復城之謠。蓋杭人怨之極言其易耳。

### 假馬總鎮

徐中丞守蘇。初有清野之議。不果行。四月丁卯。有馬鎮軍至。不知所從來。趣燒城外民房。中丞不可。馬曰。野不清。城不可守。乃予二萬金爲清野費。適城外火起。益令軍士縱火焚之。而鎮軍不知所往。時天雨氣寒。百姓謂賊已至。從水火中踉蹌而奔。兵搜於途。勇括於室。婦孺投河。及踐踏死者無算。越兩晝夜火熄。而眞馬鎮軍乃至。守城兵以爲僞也。殺之。

### 卞令之死戰

賊初至蘇。以省垣四面受敵。不欲據守。日驅丁壯運物葑橋爲去計。時制軍方伯不知所在。大營潰官寂無影響。後十日丙戌。賊分衆南下。與皖南鎮江長貴戰於吳江。

之勝墩。長貴兵敗入湖港。遂陷嘉興。由是兩旬之間。破州縣二十八。九。五月癸卯。由青浦進犯松江。知婁縣事卞乃譚欲出戰。華亭趙某欲守城。卞曰。不戰胡以守。時提標各營先期登舟。弁兵存者寥寥。卞獨率勇迎擊。戰少却。已而後隊蜂擁。火器不給。乃譚敗回。欲閉城拒守。賊追之急。中銃於馬上。猶據鞍馳數里。入署而卒。乃譚之外。有秀水令彭君。溧陽令尙君。是三十州縣中。同時殉難者。尙名坵布。彭佚其名。

### 何制軍之畏蒞

何制軍初履江督任。王雪軒方伯實左右之。虛心下士。延攬英豪。凡爲物望所歸。不惜口齒獎借。如致清河吳公書云。側聞政績。每思相遇。何疎。偏閱時英。益歎此才不易。致六合溫公書云。有不戰戰必勝。居然儒將風流。不言功。功最高。信是中流砥柱。此外若張殿臣。總統馮提軍子才。或誼結師生。或禮分賓主。誠哉人才之總匯。幕府之去規也。及方伯升任浙江。頓失常度。常州之亂。莫知所之。沿途減騶從。去旗幟。無有識爲宮保船者。而奏報掩飾各情。謂蘇府奉撫臣文。商借夷兵。先期赴滬。藩司三

縣均受重傷。其是否朝廷不知也。又謂撫臣設立機密房。任用戚友小人。署外不得與聞軍事。其是否死者不知也。自謂巡視江口。安輯夷務。調赴江靖。如臯防守。有某省某提督。分守瓜儀。諫壁有某鎮某總兵。累累言之。失中而固外。其是否天下後世不知也。善哉言也。

### 官弁之分米

初滬上大憲遣英吉利呂宋兵。助清兵勇。收復松江。賊遺米萬餘石。夷取其千。故華亭邑令帥勇急入。比戶按驗。適新令營弁復至。顧米而爭。觀察吳公命予官弁千石。有差。餘以實倉廩。嚴箠。謹出入焉。先是賊驅百姓中壯者出戰。老幼廢疾者日給升米養之。至是米歸於官。窮民轉不能望撮勺。踰月。攻青浦。清兵失利。賊衆衝出。復陷松江。焚米毀城而去。遠近農民各擢小舟入城。裝運梁柱窗几之屬。墮牆掘地。搜括一空。巨室重門。洞見前後。而得米之官弁。又莫知所之矣。或曰。賊以豺狼蛇蝎之資。魚肉百姓。惡矣。然亦觸矢石。冒水火。瀕險而得之。官吏毛髮無所與。各分米千百。

石拱手而享其成。不言而喜可知也。

### 鰲子疊之膠船

浙江甯紹既陷。賊以重兵圍杭州。期於必得。時餉道斷絕。城內斗米千錢。窮民至煮箱皮食之。朝廷責蘇撫坐擁重兵。不急進剿。致賊全力攻浙。乃急籌餽金二十萬兩。米穀數萬石。以輪船運往浙江。將及鰲子疊。遇淺船膠。盡棄所有於溟渤之中。杭城困守月餘。餓死者日以千計。王中丞朝服自縊。遺令開城。縱放百姓。賊遂掩入。時辛酉十一月也。僞忠王李秀成棺斂中丞以下殉節諸員。餘官願從者留。不願從者給發資斧。卽令護送遺糶而還。以爲生與爲敵。死不與爲讎也。

### 兩軍門之垂成死綏

初粵賊蔓延江浙間。中丞李公以上海一隅地。遠攻近剿。如風掃籬。恢復蘇常。餘賊聚守金陵。明年曾公大兵屢掘地道於金陵城外。或半途遇水而止。或已成爲賊所覺。衆力竭矣。獨提督李公臣典曰。合諸營之力。費鉅萬之財。歷數百晝夜之勞苦。所

望者復城而後。仰報國恩。將士亦邀獎。綦不及今。一鼓作氣。攻敗垂成。後欲圖之。非可歲月計矣。乃復從賊守嚴密處。掘隧築藥。破城垣二十餘丈。李疾率諸提鎮。冒火衝入。立奏膚功。而公亦由此受病不起矣。中丞之肅清吳中也。深得陳軍門學啓之助。僞慕王等降後。心懷反側。桀驁不馴。中丞用軍門言。乘勢駢誅。以消後患。後陳以嘉興中礮。創重捐軀。奏疏中歷敘勲勞。至今猶有生氣。兩軍門足千古矣。

### 炊飯太守

洪軍之初陷杭州也。有候補府者。著矩衣。躡敝屣。將行被執。賊問何爲。詭曰炊飯。賊曰善。卽使炊飯。而守故紈袴子。不諳烹庖。乃密使蒼頭代役。而太守獻之。及張提軍克復杭城。官吏多亡去。卽檄炊飯太守攝某篆。守感蒼頭惠。令其司閤。而苦不識字。復爲置一明黠小僮。代司文書出入。阿堵物一歸蒼頭焉。同時有觀察某。伏匿堂額上。賊至。戰栗墮地。問何爲。曰種菜。賊卽使種菜。已而備兵嘉湖。時謂之種菜觀察。

### 曾文正公知人

近世士大夫。多稱曾文正公能知人。非妄語也。江忠烈公忠源。初謁公於京邸。既別去。公目送之曰。此人必名天下。然當以節烈死。時天下方無事。衆訝其言之不倫。後十餘年。忠烈果自領偏師。戰功甚偉。嗣殉難廬州。公東征時。滬上乞師。公奏請以相國合肥李公赴滬。而以參將程忠烈公學啟從。臨發。公送之登舟。拊忠烈背曰。江南人譽張國樑不去口。君去亦一國樑也。行聞君克蘇州矣。勉之。李公至滬。由下游進兵。自青浦崑山轉戰。至江蘇行省。拔名城。殪大慙。雖嘗借助英法兵。而西人獨推忠烈功爲淮軍諸將最。其聲威殊不出張忠武下。嗣克嘉興。先登中鎗。仆地。卒不救。其以死勤事。亦與忠武同。蓋昇平之際。物色人才。危急之秋。激昂忠義。精神所感。誠至明生文正儒臣。豈有相人術哉。嗚呼。洵天人矣。

### 張阿寶

洋槍隊之有統帶。蓋舉當地人領之。至教習進退坐作之法。以及臨陣督隊。則仍另雇西人。當江浙諸城克復時。頗得其力。然所招多無賴。易滋事。甚如聚黨搶掠。亦或

不免。而於所謂統帶者。飄翠羽。乘暖轎。騎從如雲。人皆避道。本地風光。亦云至矣。乃亦有倚勢凌人。武斷鄉里。意稍拂。卽帶勇嚇詐。有洋槍哨總擬保都司儘光守備提標右營下藍翎千總張鳳祥者。原名阿寶。以娼家子入隊。拔至哨總。而素行甚穢。無惡不作。不僅私設公案。錮人勒贖已也。經丁日昌訪聞屬實。飭縣出示招告。受其害者紛紛呈控。提訊明確。請令正法。人皆快之。

### 多隆阿之將略

中興名將帥。隸旗籍者。必首數塔齊布及都興阿。天下無異詞。其驍果任戰。疊樹大勳。與兵事相始終。尤以多隆阿爲八旗勁旅中功第一。咸豐八年冬。公偕鮑超禦安慶。援賊一日。粵軍犯鮑軍。急來請援。公辭不赴。特張樂宴諸將。酣呼達旦。敵偵知無備。遽舍鮑營。乘夜來襲。公預伏兵要隘。賊至大敗之。十一年七月。粵軍由英霍趨太湖。連營數十里。公命佯敗以誘之。稱病甚不能督軍。敵至偃旗息鼓。閉關不出。敵大詈如弗聞也者。如是數日夕。敵終疑之。尋獲我間諜。謂公實大病。遂來犯。公預伏二



十營於左右路。敵至夾擊。皆棄械奔桐城。嗣是追逐截擊。捷報日聞。一夕公登轎車遠眺。曰賊衆十倍我。連戰皆挫。今知我所在。夜必來劫營。乃潛徙其軍。敵夜至。得空營。大驚。自相踐藉。死無數。引去。安慶之克。公功最多。蓋天授將略。其神勇尤出塔公都公上云。多治軍二十年。所得廉俸。悉以賞健士。恤傷亡。官文知公貧。郵寄三千金贍其家。公知之。馳卒追取。爲戰士購征袍。方公盤屋受創時。清帝發內府珍藥敷治。並命黑龍江將軍傳知其子雙全。馳驛往視。而忠勇無家。其子絮衣葛屨。寄食親串。將軍資以行裝。始得上道。忠勇遺疏有云。不使家有長物。身有餘財。確非虛語。

### 客將戈登事略

戈登英國名將。名查里斯若耳治。道光十二年春。生於烏利刺城。父爲御軍礮隊大將。娶婦宴德庇氏。名以利撒畢。生四子。戈登爲季。戈登之先。出於巴克邑之氏族。卽今英國侯爵亨特利氏之支派也。戈登初在塘墩就學。年十四歲。進烏利刺武備館。十九歲授御軍工營校。咸豐五年。英人伐俄羅斯。始從征至俄國。圍西拔斯拖浦海。

口。在此晝夜守城濠督戰。自咸豐五年春至城陷始罷。嘗受微傷。先城南既陷。戈登即調赴梗盤。尋仍回西拔斯拖浦。城陷令毀城中礮臺船廠。英俄事平。從勘定俄突新界。咸豐十年中外構釁。英人犯我順天。戈登從英軍陷京師。焚圓明園。事平。適中國粵匪亂。同治二年。江浙兩省上游在滬設洋槍隊。將校用歐美人。乃向英官商使戈登領之。戈登遂與賊轉戰於江浙兩省。二年間凡三十三戰。克復城邑無算。江浙爲中土最富繁之地。數年經賊蹂躪。至是兩省強寇始悉殲平。是役經時一十八月。僅費軍需一百萬金。人皆以爲奇功。稱戈登爲當時名將。戈登謙遜曰。平此烏合之賊。豈足稱耶。但緩以時日。中國官兵亦可以平賊也。然中國上官急奏膚功。遂在上海招募外洋無業亡命之徒。欲借以平賊。不知此輩既以利應。反復無常。幾將貽害中國。較土匪之禍尤烈耳。鄙人得統此輩。嚴加約束。事後設法遣散。不使爲患。此則鄙人所以有微功於中國也。當時蘇州克復。江蘇巡撫今相國李公殺降賊。戈登不義之。中國賜戈登萬金。戈登辭之曰。鄙人効力中國。實因憫中國百姓之荼炭。鄙人

非賣劍客也。同治三年自中土回國。遊橐索然如故。尋擢補格列弗司恩海口軍領工程隊。居此六年。每於公餘之暇。籌給貧乏。遇有病疾者施醫藥。民間流離無依小兒。皆爲收養。教之讀書。或薦至各船傭工。不使失所。先英俄諸國。議開潔扭河。准各國商船出入。各派使守河口。同治十三年。戈登解任。簡赴渤波勒卞利亞國。爲潔扭河河口使。光緒元年。戈登應埃及王之聘。至蘇丹。先是埃及國沿尼羅河南邊近赤道之境。總名曰蘇丹。皆沙漠荒野之地。無此域土地寬闊。極南近又尋得大湖數處。埃及王曾令英人伯客沙謬往開闢。二年未竣事。辭職去。王聘戈登仍令往接辦其事。戈登在此煙瘴絕域三年。竭力任其事。凡地理之險阻。天時之惡劣。以及土人之悍梗。皆以堅心毅志勝之。沿尼羅河一帶。皆設汛兵。又自埃及定造輪船。使上駛尼羅河。遇灘水淺。卽將船折爲數段。過灘後。仍行合攏。於是蘇丹南境大湖曰亞勒伯坭恩舍。始有輪船行走。戈登在此苦心竭力任事。其意不在徒得土地之利。蓋此域土人之強者。向劫掠人口販鬻爲奴。戈登至此。卽欲化其俗。禁販奴事。然蘇丹西境

有二省曰哥爾多番。曰達爾夫。此皆爲販奴者澤藪。兩省不歸戈登一人統轄。則販奴之事。實不能禁絕。埃及王乃不授此兩省。故於光緒二年。戈登遂辭職回國。光緒三年春。經埃及王再三重請。戈登乃復至埃及。授蘇丹全境總督。凡北自尼羅河之第二灘。至南境之大湖。東至紅海。至西境。又特湖諸水發源之處。皆歸戈登統轄。三年之間。徧巡諸地。居無定所。時或至東境。與啞比西尼亞國諸部。勘定疆界。時或輕騎滅從。驟至西境。達爾夫省。捕拿販奴暴客。並以懾服部酋之倔強者。常竟月在駱駝背上。未嘗解鞍。政令一出。志在必行。境內強暴雖多。沙漠烈日雖酷。皆不能稍抑其堅力銳志。又四出無常。土人視之。猶鬼神出沒。無所不至。故諸部蠻夷皆爲震服。而蘇丹境至此始有王法。政令行焉。當時外人在埃及。獻說干預政事。王大臣不能鎮定。遂聽外人遊說。紛紛更改法制。以致政令朝出而暮改。於是戈登在蘇丹。覺事多掣肘。於光緒六年。遂又解職回國。此年英國簡命子爵黎本爲印度經略大臣。黎本辟戈登爲參軍記室。同至印度。無幾。戈登與經略幕僚意見不合。卽請解任。適中

國與俄國爲伊黎事牴牾。中國洋關總稅司赫德。逕電請戈登至中國商量事件。戈登此行。英國政府因戈登係英國職官。干預中俄軍。恐貽俄人口實。故電止戈登。令即時回國。戈登復電曰。我至中國爲排難而已。如朝廷因我係職官。恐貽口實。請悉除銜職。則萬無誤事。戈登至北京。見總理各國事務大臣。力陳中國武備不修。戰爭無力。不如遷就以護大局。大臣問曰。如事決裂。肯相助否。對曰。事如決裂。皇帝肯遷駕內地。鄙人當爲中國效力。任疆場事。後事遂解。當時戈登行至天津。見中國北洋大臣李文忠。文忠對外人怨北京諸大臣主戰誤國事。有某國公使勸中國李文忠借戈登力。擁兵至京師。黜諸大臣。廢皇帝。自立爲皇帝。戈登聞之。歎曰。鄙人雖一武夫。作事何肯鹵莽至此耶。戈登回國。是時英國阿爾蘭島富豪世族。兼并貧戶。私歛重於公稅。民庶困窮。亂人充斥。戈登因往徧歷阿爾蘭諸郡。目覩田疇荒蕪。農夫凍餓。遂條陳變田租法。朝議不可。然所建白皆切時弊。後數年。英廷竟改阿爾蘭田租法。本戈登意也。戈登條陳多忤朝臣意。自知在朝必不得大用。適英屬地毛里西亞。

島統兵大將出缺。毛里西亞在印度洋大海中一孤島也。英人置戍兵。英官畏遠。成皆不願往。戈登遂自請往署焉。戈登官斯島一年。軍民稱之。會阿非利加洲極南有英屬地曰岌朴。或曰好望角。英人建埠頭。關地利。英民與鄰境番部時有爭鬪。官吏不善處置。各部遂叛。英國駐岌朴大臣因請英廷特派戈登往調停其事。戈登即由毛里西亞航海至岌朴。檢察情由。卽上書大臣曰。番部之叛。皆由官吏不能約束本國人。使侵害番人。今擬先簡嚴正之員。令其約束本國人。然後可以服番衆而保無虞也。乃條陳處置法。然所議皆爲大臣幕僚梗阻不行。戈登遂請解任回國。戈登旣在閒散之列。請假往遊猶太國。猶太昔西人教主耶穌生育行教之地。多古名勝。戈登至此。感古今興衰滄桑之蹟。徧歷流覽一年始回國。是時埃及國南境之地。自戈登去後。官吏貪酷虐民。各屬回部皆叛起。殺官吏。攻官兵。有大酋自稱救世主。奉天命復回教。誅無道埃及官兵。竟被困在噶墩城。於是埃及王乃請於英廷。借一大將使救出困兵。英廷仍派戈登。隨帶將校二員。至噶墩城。時圍尙未迫。戈登卽欲率被

圍官兵出城。然城中避難官吏及家屬老弱婦女萬餘人。戈登不忍棄之。故留守先將婦女二千餘人護送出境。逮及城圍既重。英廷有電催戈登率部曲棄城。戈登復電曰。軍民爲我抗賊守城。今事迫乃棄之。此豈丈夫之所爲耶。戈登在圍已五閱月。外援已絕。糧食將盡。然猶從容督率軍民拒守。於是英廷乃撥兵合埃及官兵。溯尼羅河赴救。兩月後救兵始至。然城已陷。戈登卒被害。時年五十三歲。喪耗至英國。官民皆哀傷之。英廷賜其家屬十萬金。並爲鑄銅像於都城。以誌其忠烈云。

### 洋將之儒雅風流

英國總兵丟樂德克奉其國主之命。駐防寧波。以保衛國之商旅。同治元年四月寧波之復。丟與有力。及九月中賊大隊攻撲寧郡。丟率洋兵五十人入城助守。出奇制勝。嗣綠頭勇滋事。丟復會同我官軍靖其難。爲人恂恂儒雅。和衆而識大體。寧之官紳皆親愛之。十二月我軍之洋將買忒勒攻紹興城中礮死。李帥所遣之德克碑未來。在紹之洋鎗隊無統帥。史士良觀察請丟往權代之。丟不可曰。我國法駐防官不

能出百里外。觀察強之。其國之領事繙譯等官。亦相爲聳恿。丟乃以打鳥報其提督。而率衆行。蓋打鳥則可出百里矣。既至與賊戰。大破之。俟德克碑至。乃退。明年正月。紹城克復。丟只因擅離汎地爲其提督劾罷。寧人大戚。公籲留之。不可。觀察與衆紳士籌商。餽白金萬兩以贖。丟不受。固與之。則曰。我國法人臣不能受鄰國贈賄也。無已。則留二千金以犒其軍士。是蓋從我與中國捍患者。其八千金斷斷卻之矣。臨別流涕。謂觀察曰。我與寧人相處久。承相愛。歸後雖死亦不忘寧人。更有一言相告。洋鎗隊勇丁訓練已成。不可以賊平而遂撤之。留之不特以自衛。亦可備意外警。須切記之。遂揚帆去。李文忠聞之。爲之感歎。不置云。至今寧波人士言及丟總兵者。未嘗不嘖然思也。買忒勒。法國人。受中國總兵官銜。臨陣奮不顧身。遂殞於紹興城下。頗讀華書。吳春泉刺史冬日嘗往訪之。會北風大作。買執吳手曰。北風其涼。雨雪其雱。惠而好我。攜手同行。洋將也。而頗有中土儒將風流之概矣。

### 長勝軍始於客將華爾



清咸豐末。粵兵陷蘇常。分股竄松江。青嘉川南等處。先後失守。滬城危如累卵。時有華爾者。美國人也。長於粵。嘗來申江貿易。乃招精壯數百人。以花布纏頭。服青呢小袖短衣。狀類西兵。各執洋槍。教以進退布陣之法。凡八十人爲一排。挨次而進。步無錯亂。號長勝軍。人又呼爲洋槍小隊。其後攻城奪邑。長爲諸軍冠。賊甚憚之。時各國助勤兵未集。曾帥大軍亦未至。滬城實賴以安。迨賊棄松江。大憲卽飭華爾往守。廣招勤習。所謂洋槍隊者。共得四五百人。值賊勢方熾。浙之嘉湖。松之青金。奉皆爲賊窟。去郡又不及百里。而賊始終不敢犯。且嘗分軍協擊。所到必克。清廷獎其功。授職總戎。卽鎮松江。蓋中國之練洋槍。實自華始。後以攻慈谿陣亡。松郡士民。思其戰守之績。無不悼惜。同時又有法蘭西提督卜羅德。協勦柘林。受槍殞命。華爾旣沒。復有夷人白齊。其衆不久從賊。旋爲清兵所獲。逐回本國。繼又私入中國。在漳州助逆。爲閩浙總督左帥宗棠所擒。時英國福州領事。仍請解回審辦。左帥不允。差官押赴蘇城。詎惡貫已盈。以舟覆蘭谿溺死。

